


# CLOUVIS HUGUES

## *Obro prouvençalo*

(1851-1907)



**C.I.E.L. d'Oc**

*Centre International de l'Écrit en Langue d'Oc*

3 Place Joffre, 13130 Berre L'Étang

<http://www.lpl.univ-aix.fr/guests/ciel/>

## **Identita :**

Noum : *HUGUES*

Pichot noum : *Clouvis, Ubert*

Nascu lou : *3 de novèmbre de 1851*

à : *Menerbo (Vau-Cluso)*

Naciounalita franceso

Proufessioun : *journalisto*

Péu : *castan*

Iue : *marroun*

Taio : *1,66 m*

Signe particulié : *caro criblado de pichoto verolo*

Martigny, 1é de Setèmbre 1892

### **Lou Castelet**

Ei pas que fugue grand, mai l'ame,  
Lou moulin mounte siéu nascu,  
Dins lou vounvounet dis eissame  
Mai que dins lou brut dis escut

La chambreto, que s'amoulouno  
Souto la plueio e dins lou vènt,  
Ris en durbènt sa fenestrouno  
A l'aubeto lindo que vèn.

I'a 'no téulisseto dessouto,  
Crebassado coume un valat,  
Ounte dos rodo, tóuti routo,  
Laisson lis aragno fiela.

Li gràndi branco banarudo,  
Dins l'estiéu, quand tout s'espandia,  
La tènon tant bèn escoundudo  
Que dirias quasimen un nis.

Lou quitère, aucelet voulaire,  
Sènsou fouesso alo, e tout soulet;  
Mai, quand pantaie de ma maire,:  
Siéu sèmpre lou meme aucelet.

Ei pas que fugue grand, mai l'ame,  
Lou moulin mounte siéu nascu,  
Dins lou vounvounet dis eissame  
Mai que dins lou brut dis escut.

O! D'aquéu nis! Sabe d'arlèri  
Que soun nascu dins de castèu:  
Quouro saran au cementèri  
Saran-ti pu riche que iéu?

Ei pas que fugue grand mai l'ame,  
Lou moulin mounte siéu nascu,  
Dins lou vounvounet dis eissame  
Mai que dins lou brut dis escut!

Entre Menerbo e li Baumeto  
Fai soun panpan tout risoulet:  
Bèn que s'auboure sèns tourreto,  
Li gènt li dien « lou Castelet »

Lou noum musiquejo e m'agrado,  
La rimo sautejo à l'entour:  
Ié dèu veni dóu tèms di fado,  
Quand viravo pèr lou Segnour.

Tenès, lou viéu enca coumo èro,  
Poulidounet à faire gau,  
Emé li cavalié de guerro  
Que tabason à soun pourtau.

Lou mouine s'amouro à la fiolo;  
Lou bon mounié, galoi jouvènt,  
Porge un pau de bren à la miolo  
Que i'adus lou blad dóu couvènt.

E deforo, sout li platano  
Ounte ausis lou ventoulet,  
La marquiso de Cremejano  
Se fai bressa pèr si varlet.

Ei pas que fugue grand, mai l'ame,  
Lou moulin mounte siéu nascu,  
Dins lou vounvounet dis eissame  
Mai que dins lou brut dis escut.

Plus de sóudard o de marquiso!  
Mai la dindouleto, au printèms,  
Voulastrejo dins la remiso;  
E lou pichot nis ei countènt.

Lis aucèu canton sa preièro,  
L'aubeto siavo dis soun laus,  
Dins lei grand roucas de l'ausiero,  
Que pendoulon souto lou baus.

Li flous rison coume de bouco,  
Dins lou matin fres e daura;  
L'abiho s'entorno à sa souco,  
Vers lei piboulo, au bord di prat.

Pèr que lou merle se ié pause,  
La font s'aubouro vers lou cèu;  
Dins l'oumbro plourouso di sause,  
L'aigueto clarejo au bournèu.

E pièi amount, sus lou gruiaire,  
Pròchi dóu vòu di cigaloun,  
I'a la chambreto ounte, pecaire!  
Mouriguè ma grand Madeloun!

Ei pas que fugue grand, mai l'ame,  
Lou moulin mounte siéu nascu,  
Dins lou vounvounet dis eissame  
Mai que dins lou brut dis escut!

I'a tambèn li platano encaro,  
Quihado dre davans l'oustau,  
Emé soun oumbro verdo e claro  
Que se duerb coume un ventau.

Lis aman, pèr-ço qu'an l'èr fièr  
De l'obro de nòsti bèu mort;  
An sa racino dins la terro  
Pas tant que l'an dins nòsti cor.

Un bouscatié qu'a fa fourtuno  
Pico à la porto un jour de mai:  
Devrias bèn me n'en vendre uno;  
- Ei de bon bos, lou pagarai!

La móuturado anavo gaire;  
La famiho tenguè counsèu.  
Nòsti bràvis aubre! que faire ?  
Quand sias paure, l'argènt es bèu.

Mai fau, se la móuturo manco,  
Prene lou marrit tèms coume ei;  
E restè 'mé tóuti si branco,  
L'aubre qu'avien planta li vièi!

Ei pas que fugue grand, mai l'ame,  
Lou moulin mounte siéu nascu,  
Din lou vounvounet dis eissame  
Mai que dins lou brut dis escut!

I'a de marrias qu'ei pas de crèire  
Que siegon tant desnatura:  
Avien vougu rauba mi rèire  
De l'aigo que lou fai vira.

Mi rèire avien la car soulido:  
Garo i gusas, richas o noun!  
E sabe de vièi en bastido,  
Que n'an garda lou bon renoum.

Dins l'estiéu, lou Cauloun se pauso;  
Lou soulèu dardaio e lou béu:  
Pèr l'adurre dins la resclauso,  
Partien plus qu'emé si fusiéu!

E se dins li draiolo estrecho  
Eron passa li maufatan  
Tambèn, anas, l'aurien aducho,  
L'aigo que ié fasié de pan!

Ei pèr acò que, sout la colo  
Ounte soun jamai revengu,  
Lou Cauloun fai vira la molo,  
Quand l'estiéu l'a pas tout begu.

Ei pas que fugue grand, mai l'ame  
Lou moulin mounte siéu nascu,  
Dins lou vounvounet dis eissame  
Mai que dins lou brut dis escut!

Li rèire an bèn fa, cambarado!  
Ié diéu gramaci de m'agué  
Pourgi lou nis e la becado  
Quand l'auceloun espeliguè.

Cado fes qu'un pantai m'encanto  
E qu'ai besoun d'un bon soulas,  
Es èli que soun amo canto,  
Dins lou silènci d'un bouscas.

Eron aqui, sus quauco cimo,  
Dins leis aubre dóu moulinet,  
Quand preniéu ma proumiero rimo  
E moun darnié parpaiounet.

Quand ié revène emé ma Jano,  
Au Castelet tant agradiéu,  
Tout ço que me fasié chavano  
Se fai cant de glòri pér iéu.

I'anarai, avans de me jaire  
Mounte nous fau tóutis ana  
Respira l'amo de moun paire  
Dins leis iéli qu'a samena!

Ei pas que fugue grand, mai l'ame,  
Lou moulin mounte siéu nascu,  
Dins lou vounvounet dis eissame  
Mai que dins lou brut dis escut.

2 e 3 jun de 1879

**A Rimo-Sausso**  
(Direitor de la Sartan)

Tu que m'as fa de vers en lengo provençalo,  
Gramaci, bon jouvènt! Toun cant m'a fa plesi,  
A dessouto moun front fa vounvouna sis alo  
E moun cor pensatiéu, l'entènd encar brusi.

Tout es bèu, tout es grand dins nosto capitalo,  
Mai voste ardènt soulèu manco à neste desi,  
Lou cèu plouro toujour, e la pauro cigalo  
Es lèu discourajado e canto gaire eici.

Iéu, quand vole escaufa ma tèsto refrejado,  
Vau vers Vitour Hugo, mi caufa à si pensado  
Coume s'èro soulet pèr escaufa Paris.

Puei, tout reviscoula, lóugié coume uno caio,  
M'enfounse dins li bos e tout de-long li draio,  
Parle emé lis aucèu la lengo dóu païs.

N. B. : Rimo-Sausso: Pascau Cros, foundadou de la Sartan

Paris, 22 de mai de 1882

### A Flourian

Flourian, o grand fablejaire  
Que legissiés lou cor uman,  
Venèn, t'adusèn de tout caire  
De flour, de flour à pléni man,  
Perqué voulèn te faire fèsto,  
Perqué voulèn subre ta tèsto,  
Amistous, galoi, sounjarèu,  
Faire giscla dintre la terro,  
Liuen di bataio e di coulèro,  
Un bon pichot rai de soulèu!

Aurian pouscu, davans l'Istòri  
Qu'escrieu li siècle emé soun det,  
Espincha dardaia la glòri  
D'aquéli que soun au poudé:  
Mai nàutri sian li pantaiaire,  
E coume li lausié, pecaire!  
Fan pas veni li parpaioun,  
Preferan, santo ribambello,  
Is esclapaire de cervello,  
Aquéli que fan de cansoun!

Mounte soun li cerco-batèsto,  
Aro qu'a boufa lou mistrau?  
Quau li benesis? Que n'en rèsto,  
Quand soun aclapa dins lou trau?  
Espaventouso meraviho!  
L'abiho, la pichouno abiho  
Que vounvounejo dins lou vènt,  
Emé si lóugiéris aleto  
Fai mai de brut touto souleto  
Que tóuti li Cesar ensèn!

I'a que la Bèuta que demoro:  
Ounour à l'eterno Bèuta!  
Quau dounc poudra jita deforo  
Dóu pople e de l'umanita  
Aquéu que, dins la pèiro blanco,  
Aura fa trampela lis anco  
De Galatèio e de Venus  
Aquéu que, pèr canta soun brinde  
Aura fa, davans lou cèu linde,  
Flameja soun pantai tout nus?

L'annado, sorre de l'annado,  
Sauclo li palais e li mas;  
Emé sa goulo entenebrado  
L'Oucean manjo li roucas;  
L'ome fai que passa, rèn duro;  
Tout desparèis dins la naturo,  
Lou nis, l'auceloun, l'aubre verd,  
E pamens, o Camardo palo,  
L'Eternita duerbe sis alo  
Davans la glòri d'un bèu vers!

Ei pèr acò que, dins la vido  
Ounte chascun fai ço que vòu,  
S'enanan, l'amo trefoulido  
Pèr la cansoun di roussignòu;  
Ei pèr acò qu'aman li bello,  
Ei pèr acò qu'à toun Estello,  
A toun Nemourin, bèu pastour,  
Adusèn, emé li courouno,  
Vincenet, fòu de sa chatouno,  
Mirèio, que more d'amour.

Ei nàutri que sian li troubaire,  
Li galoi cercaire de nis,  
Li felibre, li calignaire  
De tout co que vounvouno e ris;  
Ei nàutri que, dins l'empirèio,  
Cacaluchan nòsti gourbèio  
Emé li garbo de clarta,  
E n'avèn pèr uno journado  
D'uno vióuleto regardado,  
Dóu murmur di riéu escouta!

Dóu founs di mas e di cabano,  
Sian vengu planta dins Paris  
La vièio bandiero pacano  
Ounte la liberta flouris:  
Es largo, es grando, es sèmpre bello!  
L'an festounado emé d'estello,  
L'an trenado emé de soulèu,  
E pèr bèn te la faire vèire,  
O Flourian, neste bon rèire,  
La desplegan sus toun toumbèu.

Te pourtan, nautre, la jouvènço,  
Sus l'esquino, dins nòsti bras,  
Mistrau, l'Oumèro de Prouvènco  
Noste Vergèli, Fèlis Gras...  
Te menan tutto la famiho:  
Aubanèu, Wyse, Roumaniho,  
E te cantan, souto lou cèu  
Dins nosto lengo prouvençalo  
Facho emé d'alo de cigalo,  
Emé de franjo de drapèu!

Pièi, quand auren sus ta memòri  
Sus ta siavo inmortalita,  
Proun canteja li cant de glòri  
Pèr la Franço e pèr la Bèuta,  
Escoutaren, de-vers ta touumbo,

Ounte, ai las! chasco annado touumbo  
Uno plumo de neste nis,  
Lou darrié brut de nòsti rimo  
Dins la fraternita sublimo  
De la Prouvènço e de Paris!

- - -

1883

### Clemènço Isauro

Fraire, canten, canten l'aubado!  
I'a 'no femo qu'à soun entour,  
Dins lou trelusènt de si piado,  
Tèn despièi quatre cènts annado  
Li pantaiaire dóu Miejour:  
Quand tout cabusso, elo s'enauro,  
E vuei l'a proumés à deman...

Pèr Clemènço Isauro,  
Zóu! Piquen di man!

La muso, meigrinello, palo,  
Nuso, lagremavo à l'escart:  
Venguè, la touquè sus l'espalo,  
E ié meteguè coume un chalo  
De rai de soulèu sus la car.  
Es despièi que la muso sauro  
Porto inmourtau soun lausié verd.

Pèr Clemènço Isauro,  
Zóu! Fasen de vers!

Bressoulejo coume uno maire,  
Dins li campas, dins li ciéuta,  
La grando raço di troubaire  
Que fan flameja de tout caire  
La rimo i pèd de la Bèuta.  
Entre que sourris, d'auro en auro  
Li Prouvençau cridon: Anen!

Pèr Clemènço Isauro,  
Zóu! Tambourinen!

I'adurren nòsti chatouneto,  
Emé de flour dins si péu lis,  
Emé si gauto poulideto  
Que rougejon e fan lingueto  
Au moussirot que trefoulis;  
E dansaren coume de pauro,  
Lou cor galoi, lis iue ardènt...

Pèr Clemènço Isauro,  
Zóu! Lou fifre i dènt!

Dins l'espaventouso sournuro  
Ounte la vido nous bandis,  
Fai clareja sèmpre mai puro  
La santo lèi de la naturo  
Que vòu que l'aucèu cante au nis.  
Deforo dóu pais de Lauro  
Aquéli qu'óublidon lou jas!

Pèr Clemènço Isauro,  
Zóu! Sus li marrias!

Elo, la damo de Prouvènco,  
L'avèn messo sus un autar,  
Nàutri qu'aman nosto jouvènço,  
Nàutri li fiéu de la Durènço  
Nàutri que sian pas de bastard!  
E pèr elo lou soulèu dauro  
De-longo nòsti vers lusènt...

Pèr Clemènço Isauro,  
Zóu! Canten ensèn!



**Clovis Hugues**

Se vòu se courouna d'estello,  
Dins lou cèu blu, peramoundaut,  
I'anaren culi li plus bello,  
E lèu, à pleno canestello,  
Li jeitaren dins soun faudau...  
Quand tout cabusso, elo s'enauro,  
E vuei l'a proumés à deman...  
Pèr Clemènço Isauro,  
Zóu! Piquen di man!

- - -

1884

### A Madamo Frederi Mistral

Coume souto noste cèu linde,  
Leissas-me vous canta moun brinde,  
Femo dóu Capoulié, rèino de moun païs!  
Nous adusès la souvenènço  
De noste soulèu de Prouvènço;  
E nàutri sian pèr la jouvènço,  
Quand dins un rai d'amour la glòri la flouris.

Au mitan de nòsti calamo,  
Vous devinavo emé soun amo:  
Ei per vous qu'amoundaut lis estello an pali!  
Sias dins soun cor la benesido  
E pèr l'ajuda dins sa vido,  
Vous sias facho, vous, tant pourido  
Ço qu'en cantourlejant se faguè Magali.

Quand pantaiejavo, pecaire!  
Vous sias facho l'aucèu voulaire,  
L'auceloun amistous, benastru, celestiau,  
Qu'en vesènt trelusi sei piado,  
A, souto sis alo empenado,  
Acata sa pauro pensado  
Pèr lou sauva dóu toumples e lou tira dóu mau.

Vous sias facho la margarido  
Que sèmblo, dins l'erbo espandido,  
L'estello d'eiçavau, pu claro qu'eilamount;  
La galanto flour embaumado,  
De belugo touto abihado,  
Que sèmpre mai interroujado,  
L'enamouro enca mai, perqué jamai dis noun!

Coume s'endourmié la calanco,  
Vous sias facho la nivo blanco  
Qu'estaco si dentello i pouncho di roucas  
Au ras dis aubre e dis estello,  
Dins la clarta que l'enmantello  
Eu a segui la nivo bello;  
E mounte sias ana tóuti dous, perabas?

Bono coume uno bono fado  
Vous sias facho la souleiado  
Un jour que tremoulavo emé soun pitre nus;  
E, pèr canta ‘mé li cigalo,  
Si clàri rimo prouvençalo  
An subran desplega sis alo  
Dins voste encantamen e dins voste trelus!

Quand a plega soutu la peno,  
Vous sias facho la niue sereno  
Que bressoulejo l'ome e lou fai pantaia;  
Pièi, coume sabias que rèn duro  
Ounte sourris pas la naturo,  
Vous sias facho la roso puro  
Que pèr la pouësio a sèmpre dardaia!

Fau que se rigue uno brigueto:  
Noun vous sias facho la moungeto  
Que demoro souleto au Couvènt de Sant-Blas;  
Pèr lou fugi, quand vous parlavo  
Emé sa bouco qu'alenavo  
L'aubado fouligaudo e siavo,  
Vous sias pas nimai facho anguielo de roucas!

Mai perqué fugi quau nous amo?  
Aquéli que canton, Madamo,  
An besoun d'uno sorre em' un cor noble e grand;  
E tant que nòsti tèsto palo  
Dourmiran sus vòstis espalo,  
Que nous fan chavano e rafalo?  
Sèmpre en vous regardant lis astre paliran!

## A moun ami Nandyfer

Ço que nous disès dins toun libre  
Ounèste e clar  
Ei tout lou crid dóu pople libre  
E de la mar.

Souvènti-fes - ô bataiaire  
Te n'en souvèn!  
As ausi parla li pescaire  
Amé lou vènt.

Vai! Caussigaves la jitado  
De ti pèd nus,  
Lou jou qu'au mitan di chamado  
Cante Venus.

Eres aqui, li labro palo  
Pitre dubert  
Quand soun bèu drole amé sis alo  
Flouriguè l'er.

L'esbrihaudo dins li parpello,  
Tout tremoullant,  
As entendu brounzi li velo  
I Catalan.

As entendu sus la mar lindo  
Coumo lou cèu  
Lou bru qu'en partènt per lis Indo  
Fan li batèu.

As bèu dire: escoutès encaro  
Senso estre las,  
La musico de l'aigo claro  
Sus li roucas.

Escoutés peréu li chatouno  
Au mes d'abriéu  
Qu'an sus la bouco li poutouno  
Dóu grand soulèu.

Soun assatado sus si porto,  
L'èr amistadous  
Li man suto sis anco forto  
E lis iue dous.

Galoï, amé lou bounet rouge  
— Coumo ié vai! —  
Passon e repasson, ferouge,  
Li porto-fais.

De la sereno mar latino  
Vènon tambèn  
Li bèu pescaire de sardino...  
— Pichoto eh bèn?

— Sias bèn countènt? — Coumo sias fresco! —  
— Mai de que i'a?  
— Se vous avian dins nosto pesco  
Presso au fiala!...

E Marsiho es aqui, coumo èro  
Souto lou cèu  
Quand li Diéu que cantavo Oumèro  
Eron de Diéu!

Coumo tout aco t'agradavo  
— Me l'as proun di! —  
L'as brouda dins ta fraso suavo,  
O moun Nandy!

E ieù te dièu davans toun libre  
Ounèste e clar:  
Gramaci per lou pople libre  
E pèr la mar!

---

Paris, setèmbre de 1885

### L'aureto

Quand ère pichot, m'ensouvèn,  
Amave la cansoun dóu vènt,  
E pèr l'ausi partiéu souvènt  
Dintre li draio,  
De bon matin, quand lou soulèu,  
Au mitan di blad bloundinèu,  
Fai miraieja soun calèu  
Souto li daio.

Oh! Landave coume un cifèr,  
L'iue belugant, li péu à l'èr,  
Lou pitre emé lou cor dubert  
Dins l'aubo siavo,  
Pèr-ço-que sabiéu qu'eilabas,  
Darrié la pinedo di mas,  
Lou venloulet sus li roucas  
Foulastrejavo.

Mounte l'amave sèmpre mai,  
Ero dins lou bèu mes de mai;  
Me n'a fa faire, de pantai,  
    Qu'es pas de crèire,  
Quand virouïavon si plounjoun  
Dins la Sorgo verdo de jounc,  
Ounte lou sautave à pèd joun,  
    Sènso lou vèire !

En arribant coume èro gènt!  
L'aigo risié, labro d'argènt;  
Pièi dardaiavo lou sourgènt  
    Coume uno braso,  
E fasié cascaia lèu-lèu  
Li fueio fino di canèu,  
Que, dins lou rai daura di cèu,  
    Sèmblon d'espaso.

Filavo que n'en poudié plus!  
Li barco, pintado de blu,  
Dansavon emé de belu  
    Sus l'oundo claro;  
E li toumple ounte lis aucèu  
Bagnon sis alo e se fan bèu,  
Coupavon en milo moussèu  
    L'oumbro di barro.

Toujour courrènt, lou ventoulet  
Viravo l'erbo en vertoulet;  
Lou sause plouraire au foulet  
    Tremoulejavo,  
Li grands aubre, tout estela,  
Disien à l'aigo di valat  
Que li venié reviscoula:  
    - Coume siés bravo!

Eron en aio, lis aucèu,  
Pèr fignoula li nis nouvèu!  
Lou grame durbié soun ridèu  
    Sus li vióuleto;  
Tóuti li flour s'entre-durbènt  
A l'èr que ié fasié de bèn,  
Disien i vióuleto: - Tambèn  
    Sias poulideto!

Dins la Sorgo, sus li caiau,  
Lou revoulun fasié de trau  
Que lusissien coume d'uiau  
    Souto li branco;  
L'aureto beisavo li flour;  
E pièi vesias, pas liuen dóu gourg,  
Pouncheja dins lou riau que cour,  
    Li pèiro blanco.

E iéu, countènt coume un pinsoun  
M'acatave sout li bouissoun,  
Pèr miéus escoula la cansoun  
    Toujour plus bello;  
E dins li flour, e dins li rai,  
Qu'amave sèmpre mai-que-mai,  
M'aloungave emé de pantai  
    Sout li parpello.

## **La Farandoulo**

La farandoulo? la faren,  
Lou cor gai, la tèsto flourido;  
E la faren tant que voudren,  
En aio! la taiolo i rèn,  
La man dins la man pèr la vido!  
E se dardaio lou soulèu  
Coume un flume d'or que s'escoulo,  
Lèu! lèu!  
La faren, nosto farandoulo!

Sian li Prouvençau de Paris,  
La pèu brounido e la voues claro.  
Quand juliet cansounejo e ris,  
Coume s'erian souto lou nis,  
Nàutri farandoulan encaro.  
Foro dóu lié, gènt de l'oustau!  
E, lou Cifèr dins li mesoulo,  
Dau! dau!  
La faren, nosto farandoulo!

Enca pu bello que Venus,  
Nosto Prouvènço encantarello,  
Emé si péu sus soun còu nus,  
Nous menara dins soun trelus  
Vers lou reiaume dis estello.  
E tóuti pourtaren un brout,  
Un pichot brout de ferigoulo:  
Zóu! zóu!  
La faren, nosto farandoulo!

Lou vièi tambourin miejournau  
Vounvounara coume uno abiho.  
Mèste Aubanèu nous fara gau  
Emé si cant de perdigau,  
Que soun lou pantai blu di fiho.  
E nous fau l'amour, qu'es lou pan,  
Lou pan beni que reviscoulo...  
Pan! pan!  
La faren, nosto farandoulo!

Avèn la fèsto e lou cor caud,  
Se n'i'en a qu'an la tèsto frejo.  
Que bello joio! quènti saut,  
Quand sus lou flahutet Mistrau  
O Roumaniho flahutejo!  
E se nous amon pas ansin  
Li mandaren à la Bedoulo...  
Gin! gin!  
La faren, nosto farandoulo!

La Venus d'Arle dins lou cèu,  
Mau-grat la nivo que l'acato,  
Desplegara si bras tant bèu.  
O Vincenet vendras peréu,  
Se vèn Mirèio, pauro chato!  
Faudra que tòuti dous, aquest an,  
Perqu'avèn mes lou fiò sout l'oulo,  
Tan! tan!  
La fagués, nosto farandoulo!

Dau! tòuti li bandiero en l'èr!  
E que la Prouvènço pacano,  
Amourouso de Balaguèr,  
Farandoule en cantant de vers  
Emé sa sorre catalano!  
Que fan li jouvènt, pereila,  
Dins li prat, darrié li piboulo?  
Fla! fla!  
La faren, nosto farandoulo!

Dedins un óulivié nouvèu,  
Pèr uno journado estivalo,  
T'avèn taia coume se dèu,  
O bastoun de noste drapèu  
Ounte se pauson li cigalo!  
Tis alo cuberto de rai,  
E nostro sedo que ventoulo...  
Vai! vai!  
La faren, nostro farandoulo!

T'aubouraren dins li campas,  
Dins lou trelus e dins la glòri;  
Pièi quand revendren dins li mas  
Areno, Faure e Fèlis Gras  
Nous diran de bèllis istòri.  
E vès-aqui que lou soulèu  
Coume un grand flume d'or s'escoulo:  
Lèu! lèu!  
L'avèn facho, la farandoulo!

Paris, 24 de mai 1886

### **La Prouvènço**

Nosto Prouvènço se souleio  
Dins lou vounvouna dis abèio  
Que balançon l'eissame i sause pendoulous;  
A li grands avé dins si cledo;  
E si man aliscon la sedo  
Di coucoun rous.

Quand lèvo la tèsto, e que largo  
Si biòu ferous dins la Camargo,  
Lou clar dóu Vacarés, pèr miraia li biòu,  
Se desplego i rai dis estello,  
Emé la gràci clarinello  
D'un escut nòu.

Lou cèu tout flamejant poutouno  
Lou front reiau de si chatouno,  
Tant poulideto emé si ruban espingla,  
Tant bello, emé si car daurado,  
Qu'an l'èr d'estre lou vòu di fado  
Dintre li blad.

Fai, nosto Prouvènço tant siavo,  
Giscla lou claret dins li cavo,  
Pèr-ço-que sus si colo, ounte tout reverdis  
Dins uno souleto journado,  
I'a sèmpre quauco souleiado  
Que s'espandis.

A, nosto Prouvènço tant forto,  
De toumbèu pèr couta si porto  
Quand la tempèsto boufo au travès de la nèu.  
Podon brama li flèu gimerre!  
I'a de mort tout vesti de ferre  
Dins li toumbèu!

A, nosto Prouvènço tant douço,  
L'amourié cantarèu, que poussò  
Dins la terro peirouso, au brut di vènt marin;  
E pièi, a peréu, la Prouvènço,  
Pèr faire dansa la jouvènço,  
Li tambourin!

Ei pèr acò, Prouvènço amado,  
Qu'anan pèr tóuti li countrado  
En cantant ta cansoun que brusis dins l'èr clar!  
L'avèn gardado dins l'auriho,  
Coume counsèrvon li couquiho  
Un brut de mar.

E la diren, la cansouneto,  
L'aubado fresco e risouleto,  
Tant qu'en estènt francés restaren prouvençau!  
Tant que la famiho pacano  
Ausira boufa dins Maiano  
L'autre Mistrau!

La cantaren sènso coulèro  
Dins la chavano e dins la guerro,  
Coume se sèmpre mai la santo pas vivié,  
Pèrçò-que, quand la pas nous manco,  
Nàutri poudèn coupa de branco  
Is óulivié!

### **Brinde à l'Espagno**

Nàutri que sian li Prouvençau,  
 Li fòu de tóuti leis idèio,  
 Sènso nous metre à pèd descaus,  
 Avèn qu'à faire un pichot saut  
 Pèr encamba li Pirenèio.  
 Qu'esquihe d'eici vo d'eila,  
 Que nous fai la vièio mountagno?

Tragala!

Li Prouvençau van dins l'Espagno.

E i'an an, lou pitre dubert.  
 Galoi, emé de risouleto!  
 Sian d'Espagnòu que n'an pas l'èr;  
 Mai se falié faire un Cifèr,  
 Tambèn aurian de castagneto!  
 Emé li chato, dins li blad,  
 Aurian lèu seca la magagno.

Tragala!

Soun bello, li chato d'Espagno!

L'Espagno es lou divin païs,  
 La patrìo siavo e superbo,  
 Ounte l'amour canto e souris  
 Coumo l'auceloun dins lou nis.  
 Coumo la floureto dins l'erbo,  
 Laisso la bèuta s'estela!  
 S'uno faço laido s'encagno,  
 Tragala!

Acò regardo pas l'Espagno.

Parèis, que fan pereilabas  
De brut ‘mé si tambour de basco  
Envertouia souto lou bras,  
Coumo nautre dins nòsti mas  
Pèr li fèsto de la Tarasco.  
La vido es bello: cantas-la!  
Se la Camardo l’acoumpagno,  
Tragala!  
Bandissès-la foro l’Espagno!

Oh! L’Espagno a soun plen faudau  
De jaussemin emai d'estello!  
Si pastre soun libre amoundaut,  
Dins lou soulèu vo dins l'uiu  
E lou grand cèu lis enmantello!  
Quand pèr veni béure lou la,  
Uno serp trèvo li baragno.  
Tragala!  
La tuion, li pastre d’Espagno.

Nàutri que sian li Prouvençau,  
Li fòu de tóuti lis idèio,  
Sènso nous metre à pèd descaus,  
Avèn qu'a faire un pichot saut  
Pèr encamba li Pirenèio.  
Que n'en pensarié Zorilla,  
Se sautavian pas la mountagno  
Tragala!  
E porte aquéu brinde à l’Espagno.

Mount-Rejèu, lou 1é d'óutobre de 1888

### **Li fiho de Marsiho**

Li fiho de Marsiho soun  
Tant bello,  
Emé seis iue, rai e poutoun  
D'estello.

Soun tant bello emé sei pèu brun  
De grègo,  
Qu'entre lei vèire mai que d'un  
Lei prègo.

De marcha d'aise en aubourant  
La tèsto,  
Perqué meton lei cor subran  
En fèsto!

Que vengon d'eici vo d'eiça,  
Lei fado!  
Es lou soulèu que nous leis a  
Daurado.

Puèi, la mar, bluso sout lou cèu  
De flamo,  
Li mete de soun blu peréu  
Dins l'amo.

Es ço que fa qu'an pèr sa part,  
Caduno  
L'amo tant galooio e la car  
Tant bruno!

Marsiho ris, l'ome es countènt  
Coumo èro:  
Lei fiho canton coumo au tèms  
D'Oumèro.

Meme sèns ana vers la font  
Divino,  
Sèmblo qu'an toujour sus soun front  
Que clino

La dourgo ounte toun pople-Diéu,  
Marsèio!  
S'en vengue bëure à plen bournèu  
L'Idèio!

E vaqui perqué noueste cor  
Esclato  
E canto davans lou cèu d'or  
Lei chato!

---

Paris, setèmbre 1891

### **Li lagremo**

L'aubeto bagnavo li flour.  
Diguère i flour: - Coume sias bello!  
Sias-ti li sorre dis estello,  
Que fasès pantaia d'amour?  
Avien bessai qu'à viéure uno ouro,  
Dins lou soulèu, contro lou riéu.  
Uno roso me diguè: - Siéu  
La lagremo que l'aubo plouro!

Li bos dardaiavon d'uiau.  
Diguère i nivo, sus l'auturo:  
- Qu'èi que fasès dins la naturo?  
D'ounte venès peramoundaut?  
Filavon coume un vòu de fado,  
Dins uno chavano d'estiéu.  
Lou nivo me respoundè: - Siéu  
Uno grosso larmo envoulado!

Tout clarejavo dins la niue.  
Diguère is estello sublimo:  
- Qu sias pèr nous jita di cimo  
Tant de belugo dins lis iue?  
L'uno après l'autro, sus la faci,  
Me passavo coumo un estieu.  
Uno estello me diguè: - Siéu  
Uno lagremo de l'espaci !

Lou vènt cantavo sus la mar.  
Diguère à la mar endourmido:  
- As-ti lou secrèt de la vido,  
Tu que siés lou bèu tounple amar?  
L'aigo, s'aubourant en coulèro,  
Espousquè subran jusqu'à ieu.  
Pièi la mar me resoundè: - Siéu  
Qu'uno lagremo de la terro!

La Toumbo risié dins un rai.  
Ié diguère, acouta dis anco:  
- Flour, mar, estello, niéulo blanco  
M'an troumpa, digo, pas verai?  
Rèn que de larmo sus la routo  
Aco farié lagrema Diéu ! »  
La Toumbo m'a resoundu: - Siéu  
La parpello que li béu touto!

- - -

1892

### **En pantaiant**

O! d'aqueou gusas de Rimo! S'es-ti pas garça dins lou testouias de mi fa juga moun pichoun èr entre tèms que la Sartan petejo sus lou fue! Tout acò serié proun poulid se n'avieou pas, cado semano, uno brasseto de journaou à li porge d'escrituro. Es pas toujou pèr moun plesi que va faou, cresès va bèn. A la fin finalo vèn en òdi de tafura 'mé la plumo dins leis afaire que si

passon. Tambèn m'agradarié de faire la radasso coumo lei bourgés. Dien que lou travai es la liberta; mai deou èstre, de segur, quaouque gros feniantas que va di lou proumié.

Es pas pèr mi faire pus enebria que leis aoutre, mai sieou esta un beou bedigas de pas vèndre quaouque ribanet quand èri dins leis espinard. Aro seriéu pas fourça de gagna la vidasso en tabassant sus la fraso. Aourieou bessai bèn un oustalet dins lei flour, aou bord de la mar bluio, s'avieou pa proun fa pita lei gòbi à l'esco pèr mi croumpa un castelet seignouriaou. E es aquito que leis afistoularieou, lei rimo per lei journalet qu'an pas lou pié. Ah! hè, n'en voues n'en vaqui!

Lou malur es que sian pas coulègo emé la capounarié. D'abord mi serieou estrassa daou rire aou nas dei moussu qu'aourien vougu lou pichoun riban. Quntei darnagas! Sèmblo pas verai que i'ague tant de bestiàri sus la santo terro. Puei, sàbi pas se sias coumo ieou, mai quaoucarèn mi di que mi revirarieou de moun cabanoun coumo San-Laurent sus la braso, e que l'aourié plus rèn de galoi per ieou ni lei parpaïounet que voulestrejon dins l'aureto, ni lei tant gèntei roso espandido aou souleou, se m'èri garça daou cousta dei maoufatan, dins l'escaoufèstre de la poulitico. Quan sian neissu pounchu, poudèn pas mouri carra, mi countavo moun rèire, lou viei moounié de Menerbo.

La vido si beou coumo un goubelet bèn vuja, e n'es pas l'amarun que li manco. Avès tout just pres lou mitan doou draioou qu'avès dija lei cambo esclapado e la barbo coulour de neou. Es pèr acò que soun d'arlèri, aquélei que si mantanon pas dret dins l'ounour. Tant fa tant ba! Lou camin es talamen court que voou encaro mis lou faire sènsa coousiga lei cambarado e sènsa li raouba seis espigo. Lei malandrin an bello s'escaoufa, enfournon pas dins lou traou la mounedo maou gagnado, lou jour que la Camuso passo emé sa daio bèn amouelado de fres.

L'a enca quaoucarren: mi semblarié un peca negras d'escrieoure o de parla dins nouesto tant braveto lengo prouvençalo, se m'èri gusardamen espouumpi de la susour dei pàourei marsihés. Nòuestei grand, que douarmon soutu la grando crous doou cementèri, dins lou vilajoun souleious, mounte avèn

courru pèd descaou emé la marmaio, vouelon pas que faguen tort à la terro doou pèis en rapugant ço que deou pas si rapuga. Leis aouceloun serien pas countènt, lei cigalo nous farien la chamado, e leis abiho nous vendrien pougne leis uei.

Perque vous dieou tout acò, l'ase mi quihe se va sàbi? Mai faou bèn si dire quaoucarèn quand l'on si rescounstro pèr lou proumiès coou dins lou mume oustaou. Vendrai mai aou maset de Rimo, li sartanejarai de mesado en mesado, quand la bataio doou tron de Dieou que petejo à moun entour mi leissara un moumenet per boufa. E longo mai, cambarado !

(La Sartan, n° 67)

- - -

1892

### **La soucialo**

Cridan que sian de pantaire,  
Que sabèn pas ço que voulèn,  
Aquéli que, sènso rèn faire,  
An la pocho e lou gavai plen!

Pèr leis arlèri,  
Nouesto misèri  
Dèu pas fini, faou que s'en counsoulè.

Jésus va di  
Au Paradis  
L'amo doou paure un beou jour s'espandis;  
Mai nous an precha sa mouralo  
Pèr nous mena coumo un troupeou.  
S'un coou peto, lou fiò de Dieou,  
La soustendren, la soucialo!

Nous cantan: “La fourtuno es facho  
Emé lei susour doou travai!”  
Soulamen lou pople si facho  
Perqu’es eou que tiro lou fai.

Jaque, travaio  
Pèr ta marmaio:  
Au bout de l’an as pas dous soou de mai;  
Dins un trelus  
Lei bèou Crésus  
Si fan de joio emé li plour dei gus.  
Lou drole a fre, la maire es palo:  
Ounte soun passado lei fusiéu?...  
S’un coou peto, lou fiò de Dieou,  
La soustendren, la soucialo!

Eron pamens tóuteis en aio,  
Erian sei fraire, avien pas paou,  
Quand venguerian ‘mé nouesto daio  
Li meissooun de quatre vint-noou!

Zóu! Sus la tèsto  
Dei troblo-fèsto!  
E lei bourgés pourtavon pas lou doou  
Es qu’a la fin  
Que lei gourrin

Nous an vueja la mastro e lou petrin.  
An pres la vigno segnouralo:  
Avèn pas meme lou gaveou...  
S’un coou peto, lou fiò de Dieou,  
La soustendren, la soucialo!

Se lou pople qu’a fam s’auboro,  
Lou pitre nus, lei pèd descaus,  
Coumo s’escrasavon d’amour  
Lou sang giscla sus lei caiau  
Emé sus lei frumo,  
La terro fumo  
Lou rouge mounta i vèntre dei chivau

Sout nòuestrei rèi;  
Nous faou la lèi  
Que soun l'esfrai doou souleou quand lei vèi,  
Se ti sias escapa dei balo  
La presoun t'enterro tout vieou...  
S'un coou peto, lou fiò de Dieou,  
La soustendren, la soucialo!

Dins lou tèms que l'escrutin bado,  
Pèr agué lou pichoun papié,  
Nous apellon sei cambarado,  
Nàutrei que sian lei sènso-pies.

Plus de memòri!  
Tout pèr sei glòri.  
Quand l'avèn bèn daura, lou rastelié!  
Jamai de traou  
Ai capitaou,  
Impausarian pus lèu leis esprita !  
Nous escalon sus leis esquino  
S'un coou peto, lou fiò de Dieou,  
La soustendren, la soucialo!

Que pèr nous rousiga la pèu....  
Sian bessai de pauro cervello,  
Sian proun d'ignourènci ennebla:  
Se manjan de regardello  
L'avèn quaouquei fes pas voula!  
A ço que briho  
Vai la pauriho  
Lei nouestre, au mens, sauvaren noueste blad;  
Mai nouestre su  
Es tant pouchu  
Qu'ai plebien preferen lei moussu  
Es lou gros pèis que nous avalo,  
E sian de soucis pèr eou...  
S'un coou peto, lou fiò de Dieou,  
La soustendren, la soucialo!

Lou niue ailamoundaut s'estrasso;  
Veiren leou poucheja l'uiau.  
Zóu de foro lei curo-biasso!  
Plus de mèstre! Tóuteis egau.  
Avès beou dire,  
Nous fasès rire  
Se nous prenès encar pèr de gournau!  
Lou bru que sort  
Dei sa plen d'or,  
S'esvanira se sian tóutei d'acord,  
Coumo lou cant d'uno cigalo,  
Après lou darrié jour d'estieou...  
S'un coou peto, lou fiò de Dieou,  
La gardaren, la soucialo!

(Armana de la Sartan)

- - -

1893

### Au Generau Champiouonet

Bouen generau, brave segaire,  
Bèu bastard enmenda dóu nis,  
Qu'aviés dins la vido pèr paire  
Que lou drapèu de toun païs!  
Lou pople s'aubouro e saludo  
Ta renouumado benarudo,  
Que l'esbrihaudo de si rai,  
Aro que sout la pèiro blanco  
Douermes, acala sus teis anco,  
Coumo un qu'a bèn fa soun travai!

Quente espandissamen de glòri!  
La Tour d'Auvergno, lou sóudard  
Que fai parpaleja l'Istòri,  
Fuguè soun fraire à Gibraltar.  
Dins l'espetaclouso batèsto,  
Quand landavias ensèn, la tèsto  
Au ras dóu moure dei chivau,  
Vouesteis espaso, desplegado  
Au mitan de l'orro fumado,  
Lusissien coumo doues uiau.

Quand s'aclapèron leis auvàri,  
Quand pounchejè l'estrangié fèr,  
Emé tei valènt voulountàri  
Partiguères coumo un Cifèr.  
Eron tei noble fiéu: toun amo  
Voulastrejavo, au cèu de flamo,  
Dins sei pitre desbardana;  
E si vèi, après cènt annado,  
De piado de gigant, marcado  
Sus lei terro ounte soun ana!

Au trefoulun de la bataio,  
Quand uno ciéuta si prenié,  
Pèr la pouerto o pèr la muraio,  
Intraves toujour lou premié.  
E couneissèn lou noum dei vilo,  
E ti lei dirian entre millo,  
En bouen francés, coumo si dèu,  
S'avien de noum pas tant renaire,  
Pèr lou dous parla de ta maire,  
Que canto coumo leis aucèu.

Au trelus de teis iue de braso,  
L'aiglo s'aplanto amoundaut,  
Es Hocho que tenié l'espaso,  
Quand t'estelleron generau.  
E subramen, dins l'Empirèio,  
Vejaqui Bayard que revèio  
Tureno e lou brave Crioun:  
« Regardas un pau, cambarado!  
« L'a 'ncaro de bellei journado!  
« Soun pas mouert tóuti lei lioun! »

Zou, pèr la Franço! Plus d'arlèri!  
Proun de rèi! defouero lei gus!  
Partères mai faire l'empèri  
Au mitan dei ballo à Fleurus.  
Sèmpre lou flèu que chaplo e chaplo!  
Mètes, pèr prene Roumo e Naplo  
Lou tems que fau pèr faire un saut;  
E pamens n'aviés, pèr tout faire,  
Qu'un troupèu de descaladaire,  
Lou pitre nus, lei pèd descaus!

Es pèr acò que toun estello,  
Glòri de moun païs latin,  
Dardaio encaro, sèmpre bello,  
Coumo l'estello dóu matin:  
Es pèr acò que ta valènço  
Flouris d'un souveni, Valènço,  
Ounte dourmères dins lou brès,  
E qu'ei sant jour de la culido,  
Antibo, la ciéuta flourido,  
Jito de roso à tei ciprè!

Mai se t'aiman coume sauvaire,  
T'aiman encaro mai que mai,  
D'avé garda, coumo un troubaire  
Tout l'espèr de toun mes de Mai.  
Quand lei fasèire de Tounèro,  
Ti manderian pourta la guerro,  
Ei Giroundin esparpaia.  
Aquéli pàuri troublo-fèsto  
Ti faguèron pas de sei tèsto  
Lou pantai qu'avien pantaia.

Aviés la grando fe biblico...  
Quand batiés lei Napoultan,  
Lei leissaves la Republico  
Pèr esfraia lei maufatan.  
Esperaves lei Capitolo;  
Aimaves l'aiglo que s'envolo,  
Perqué t'envoulaves peréu;  
Mai tournaves contro li Corso,  
Que duvié quauque jour, de forço  
La quiha souto lou drapèu.

Toun amo èron tant pietadouso  
Que rendiés lou bèn pèr lou mau;  
Pensaves ei maire plourouso,  
Ei vièi que reston à l'oustau.  
Jamai uno idèio marrido!  
Fuguères bouen tutto la vido;  
La justici fuguè toun Diéu.  
Es pèr acò que soun estello,  
Enca mai auto, enca mai bello,  
Sara deman quauque soulèu.

(Armana Marsihés)

*Es de bon, noste ami e counfraire Clouvis Hugues se porto candidat is eleicioun legislativo, eilamoundaut à Paris. Passara? Passara pas? Es ço que veiren dins tres jour. Mai qu'intre à l'Assemblado o que rête au bel èr, acò ié levara pas d'estre ço qu'es: un clar pouèto de nostro lengo prouvençalo, un amourous cantaire de noste souleiant.*

*Ah! d'aquel escapamounte! Au terrible moumen ounite anavo afrounta lou chafaret e li batèsto, lis estoupin e li bramado di reünioun eleitoralo, moudulavo-ti pas li poulit vers plen de calaumo e de trelus qu'anas legi! Li trouvan pèr prefaci à-n-un pichot recuei de galejado parisenco, “Les farces de Mijoulet”, que vèn de publica Jan Sarrazin. Aquéu Sarrazin es un troubaire à sa maniero, forço couneigu à Paris, ounite vai dins li brassarié chabi à cha cuiero, en meme tèms que sis oubreto, d'óulivo de Prouvènço que pesco dins un barriéu.*

*Veici li vers de Clouvis Hugues:*

**A Jehan Sarrazin**  
pouèto e vendèire d'óulivo

Canto toun cant, brave troubaire!  
La vido es amaro, pecaire!  
La nèblo emasco lou soulèu:  
Mai tout s'espandis, plus rèn manco,  
Lou nis es galoi sus la brancho,  
Quand l'ome canto emé l'aucèu.

Pereilabas dins lou terraire  
Ounte nasqueron nòsti paire  
Sabe de païsage clar,  
Que se ié vèi sout lis estello  
Passa lou tremoulun di velo,  
Grand parpaïoun blanc de la mar.

Pereila, dins li ferigoulo,  
Sabe li gènti farandoulo  
Que lou tambourin menara,  
Dintre tèms que lou cèu dardaio  
Sus lou recourbamen di daio  
Au mitan di blad tout daura.

Sabe de colo ensouleiado  
Ounte béu à la regalado  
Lou pastre countènt de si diéu;  
Sabe de bos brounzissènt d'alo  
Ounte roussignòu e cigalo  
Fan sa musico tout l'estiéu.

Li cantaras, li cigalouno,  
Lou bèu tambourin que vounvouno,  
Li grand pastre, glòri dóu mas,  
Li blad madur, li velo blanco  
Que tremolon dins la calanco  
Sout la pinedo di roucas.

E peréu cantaras, troubaire!  
Dins la naturo e pèr ti fraire,  
L'oulivié tout lusènt de rai  
Qu'ensigno la terro, avuglado  
Dins lou fum rouge dis armado,  
La Pas, la Forço e lou Travai!

(L'Aiòli, n° 95 - Armana dóu Ventour, 1899 souto lou titre de "Fau canta")

### **Lou Proumié Mai**

Soun quaouqueis arlèri que fan un chamatan doou tron de dieou e que levon lei bras aou ciele emé de figuro desaviado, coume se leis anavian esclapa sus lei roco, tóutei lei coou que si preparan à festeja lou Sant Proumié-Mai de la paouriho. A leis ousi, la terro emé la luno juegaran dei chimbalo, lei granoueio aouran plus de coue e sera la fin finalo de tout.

Mi fan susa de claveou! S'erian de maoufatan coumo en l'èr de va crèire, serian bessai d'uno classo qu'es pas la nouestro. Es elei, lei bourgés, que soun lei grand troublaire de l'ordre. Faou pas 'vé legi doues pajo d'istòri, faou èstre bësti coume l'ai de Mèstre Bartaloun pèr si figura que lei caio li soun toumbado tóutei roustdido dins lou carnié, sènso qu'agon jamai fa la batudo pèr lei campas. Elei tambèn e mai que naoutre, quand vouguèron prene sa plaço aou grand souleou si levèron coumo un soulet ome, faguèron trampela lei drapeou dins lou ciele e desborda tout la resclaouso. Lou malur es que lou pople fouguè pron enebria pèr li dona l'ajudo en s'aplatissènt leis esquino soutu soun fai. L'aoubre èro aout, emé sei beou fruei que pendouelavon. Leis aguèron leou culi, e quand lei paoure mesquin reclamèron sa part, li garcèron de coou de taloun sus la tèsto.

Ço que l'a de pus poulit, dins tout acò, es qu'à l'ouro de vuei si fruton lei man, baton la mesuro dei pèd, si meton d'acòrd emé lei fiòli quand aquélei marrias nous reprochon rèn qu'à nàoutrei, d'agué arrousa de sang la terro de Franço e gita la tèsto d'un rèi dins la banasto. Eron pamens pas de travaiadou, èron pas de gènt doou pople, pèr dire proframén lei cavo, aqueou Mirabèu qu'acoumencè pèr manda Louei XVI à la Bedoulo e aqueou Roubespierro que li faguè passa la daio nacionalo sus la barro doou couele. De gigant, es entendu; e serian d'estroupia de cervello se leis escooussijavian aro qu'an mena soun obro à boueno fin e que si soun asseta dins la glòri emé de loousié à l'entour de sei tèsto inmourtalo. Mai faou pas que fagon de

Coumte de Mèstre Arnaud: se lou sang a jiscla si n'en lavon pas lei man coumo Ponço Pilato, pèr ço que nous a aoutant fa espeli d'espino que de flour.

Quand fouguèron lei mèstre, si geinèron pas pèr nous aclapa coumo v'erian esta pèr lei noble e lei capelan. Au Camp de Mars, li tabasèron sus lou drapeou rouge; e fouguè que la prefaci. Tre que l'idèio soucialisto aguè pouncheja, representado pèr aqueou grand citouien que li disien Gracus Babeuf e pèr quàouqueis aoutre que voulien pas leissa endemia lou mihou dei rapugo dins li vigno doou pople, lei carrejèron davans lei tribunaou e zóu! mai dins la banasto! Ero pamens pas de tèsto de rèi aquélei tèsto; mai pourtavon un mounde, avien dins elei coume uno espèci de vorcan tout flamejant de justici, e que sarien devengu, lei nouveou previlègi, se lou cratèro s'èro crebassa?

S'encaro se l'èron arresta à-n-aquélei proumiérei saounado! Malurousamen nous an fusilha, nous an despourta, nous an empresouna tóutei lei coou qu'avèn vougu èstre de la fèsto e aganta nouesto part de bouenur. En 46, lei cadabre doou pople s'amoulounon dins lei carriero de Paris, en 71, lou mourtalàgi espavento l'istòri que pamens n'a proun vist. Lei pajo de Victor Hugo soun aquito que lo cridon à la pousterita.

Tout acò nous empachara pas de faire noueste Proumié Mai, coumo de citouien libre e sènsorèn descalada. Tout ço que voulèn, es e reclama. Sian d'ome: perqué nos fan-ti travaia coumo de bèsti? Perqué nous tènon-ti de journado entiero dins sei galèro, ounte la blodo remplaço la casaco doou fourça? En 89 lou pople dreissè sei caièr e lei bourgés l'aplooudissèron. Lei dreissan encaro un coou, lei pourtant à la Coumuno e vaqui tout. Que maou l'a à si plagne quand sias malaurous? Demanderian pas miés que de resta dins nòuestei oustau, emé nòuestei frumo e nòuestei enfant sènsorèn nous enana pèr carriero emé de drapeou que fan poou ai darnagas. Quand ploou de coou es pas lei bourgés que lei recebon; an lou Gouvernamen, an la poliço pèr elei e sian, nàoutrei, pas mume arma de l'ooutis que nos serve à derraba la vidasso.

Anèn, zóu! Lei cambarado! Lou mes de mai es lou grand simbolo de resureicien de la naturo, lei flour pousson, lei branco reverdejon, leis aouceou voulastrejon à l'entour dei proumié nis e tutto la terro bramo à l'Umanita que lou souleou sera pas countènt tant que lei travaiadou aouran pas fa espeli la justici coumo una flour, reverdi l'egalita coumo un rampaou e canteja la liberta coumo un aouceou!

(La Sartan, n°103, 29 d'abriéu de 1893)

- - -

Bruniquel, au Moulin dis Istournel, lou 2 d'outobre 1893.

### **Lou roure de Tubé**

Dins moun vilage ounte rèn manco,  
Se vèi un roure espetaclous,  
Emé tant de fueio e de branco  
Que lis autre n'en soun jalous.

Vers l'aubo claro, dins l'eigagno,  
Entre li colo, aperabas,  
S'aubouro coume uno mountagno  
Tremolo coume un nivoulas.

L'esfri vous prèn quand sias dessouto,  
Landarias coume de cifèr,  
Tant lou bèu gigant vous envouto  
Emé si ferouge bras verd.

Pamens i'a proun de jour, pecairet  
Quand ère enca' tout pichounet,  
Sout lou roure anavian nous jaire,  
Coume un vòu de passerounet.

Lou peje, sus la terro duro  
Que lou soustèn coume se dèu  
S'embandis 'mé l'estampaduro  
D'uno tourre de vièi castèu.

Pèd descaus dins li berigoulo,  
Li det l'un à l'autre nousa  
Se metian dès en farandoulo,  
Sènso pousqué tout embrassa.

Sèmpre enca mai lèvo la tèsto  
Sout la destrau di bouscatié.  
Vèngue lou tron e la tempèsto  
Chasco branco es un roure entié.

La cansoun dis qu'au mes di fado  
Dous bon chivalié dóu païs  
Tireron sout l'aubre l'espado,  
A l'ouro que la luno ris.

Devien ama la memo bello,  
Perque tóuti dous n'en soun mort,  
Emé d'uiau dins li parpello,  
Emé li man sobre lou cor.

E desempièi, quand anas querre  
La floureto long di pradas,  
S'ausis enca li cop de ferre,  
Dins li fueio e dins lou roucas.

Es tant sournaru, moun bèu roure,  
Que l'erbo, acatado souto éu,  
Saupra jamai se vèn de ploure,  
Se fai nivo o se fai soulèu.

Mounto tant aut, dins l'aubo blanco  
Pèr lou crèire fau l'agué vist  
Que s'èron de pèiro, si branco,  
L'aiglo ié bastirié soun nis!

Après la bataio e l'esprovo,  
Vole que ié coupon lou bos  
Di quatre plancho tóuti novo  
Ounte anaran dourmi mis os.

Ansin, aurai sout lis espalo  
Sus moun paure pitre dubert,  
L'amo de ma terro natalo  
Flourido de soulèu e d'èr.

Se dins lou trau vènon me traire  
Liuen de moun brès e de moun cèu,  
Moun paire emé ma santo maire,  
Li sentirai proche de iéu,

Pèr-ço-que, quand soun bèu futage  
Verdejavo, dempièi milo an,  
Dansèron bessai au village,  
Sout lou grand roure tremoulant.

---

1894

### A parla!...

Lou cresieu mort! Coume passave, adavans ièr sus lou cours dóu Chapitre l'ai vist passa, lou grave moussu Delibes, aquéu que garço li soucialisto dins sa pòchi e que l'autre jour, davan lou mounumen ounte Turcan a quiha uno patrìo, si despoutentavo à nous desounoura davans lou drapèu. O!  
D'aquéu bougre de Delibes ! Mi souveni que dins lou tèms, quand aviéu panca. tant de margarideto dins la barbo, aquéu moussu d'aqui mountavo sus li tribuno e emé son teta-dous, debanavo d'istòri de nosto maire grand, ounte li soucialisto apareissien de longo emé de mourre de maufatan e d'esglaria.  
Uno sèro, sabe plus en quinte endré, faguè uno espeço de basarutage ounte me passavo la poumado d'uno man pèr miés me grafigna de l'autro. Faguè uno cavo espectaclouso! Crese que meme me tratè de pouèto: se me tratèsse de felibre ié mandave

mi temouin.

Dins aquelo epoco èro, à ço que m'an di, un ome de l'Universita, travaiavo dins li gros libre, espóussavo lis arno au vièi Oumèro, tutejavo Vergile e esplicavo i jouvènt qu'Orace èro pas un darnagas. Mai èro esta dóu partit de Ciceron contro aquéu paure Catilina, e me garçavo, sènso agué l'èr de ié touca, de "quousque tandem", qu'aurié derraba li bano dóu biòu de Sant-Lu. M'ère figura que tout acò èro fini e que Delibes, emé quàuquis estudi, perqué s'apren rèn dins li coulège, avié douna un cop de barro de neste caire. I'a quàuquis ome, dins neste siècle, que tout en estènt de sabentas, o de grand pouèto, an desplega au vènt dis esperit la grando bandiero dóu soucialisme. Li sonon Victor Hugo, pèr lou pas nouma, Michelet, Quinet, Loïs Blanc, Proudhon, Fourrier, Blanqui e quàuquis àutri que passon pas pèr d'estournèu: se dis meme qu'es de gros bestiari de la famiho dis aiglo e que quand arregardon lou soulèu es lou souléu qu'a pòu. Delibes éu, es bèn mai en maubre qu'aquéli gènt: a pas boulega, mai a parla! E ciò qu'a di davans lou monumen farié creba de rire lou siècle que vèn, se li generacioun nouvello avien pas mai à faire que d'estrepa dins lis oubreto d'aquel ome de lecturo.

Quand sounge qu'a vougu nous faire passa pèr de gènt sènso Patriò! Mai saup dounc pas, lou moussu, que la Republico, tóuti li cop que lou pople l'a arrousado de soun sang, a proclama l'idèio patrioutico e que Paris aurié pas tant fa de barricado, après la pas signado à Bourdèu, se l'Assemblado de malur, coume ié disien, avié pas signa emé l'Estrangié uno pas touto enfangado!

Me fan susa li clavèu de la crous, quand vènon nous brama qu'èli tout soulet soun de patrioto. Mai tounerro de Dieu! Soun-ti geina, èli, li gros pèis, pèr faire pache, sus li frountiero, emé tóuti li manjo-sang de pople que i'a de l'autre caire?

I'a quàuqueis an quand l'Emperaire Guilhaume, afusca de soucialisme, sounè la rampelado i grand naciounalisti de tóuti li païs, Jùli Simon, Tolain e uno banastado d'autre s'en anèron à Berlin, s'assetèron à la taulo dóu Mèstre qu'avié matraca

l'Alsaço e la Lourreno, s'enribanèron lou pitre emé li decourioun d'aquéu sacrejaire de la Franço e revenguèron tout galbau nous conta qu'èron esta bèn reçaupu.

Tu, malurous travaiaire, t'es defendu de jougne ti man emé li malurous dis àutri païs. Quand plagnes la misèri dis autre en pensant à la tiéuno, siés qu'un marrit francés; mai arranjo-ti pèr agué, deman, de picaioun dins la pòchi, pren de ventresco, espoumpisso-ti, dauro-ti sus tóuti li courduro e alor poudras ana dina encò de Guilhaume, sènsa que Delibes fague trampela si pichoun tounerre.

E qu 's que dis que l'aiman pas, la santo Patrò? Aiman talamen la grando qu'aiman aussi aquelo qu'es tutto pichouno, aquelo ounte i'a 'gu noste brès e que vounvouno encaro de la cançoun de nòsti maire. Quand lou reviéu, toun soulèu, o Marsiho, tutto moun amo voulastrejo dins li velo de ti batèu, emé li gabian que blanquinejon dins lou cèu blu, lis alo recourbado coume de voulame, tutto ma jouvènço me revèn, ai vint ans, li fiho soun bello e se pènse encaro à M. Delibes, es soulamen pèr la rimo e pèr çò qu'elor siéu l'enfant de l'oustau qu'arribo, ô Delibes !

(La Sartan n° 151, 31 de mars de 1894)

### **La revengudo**

Quand lou revesi moun païs  
E sei chato,  
Sieou coumo l'aousseou dins lou nis  
Que l'amato.

La plueio a jiscla mai que mai  
Sus meis anco  
Mai vaqui lusi l'encian rai  
Dins lei branco!

Ço que s'aubouro eilamoundaou  
Es ma roco;  
Lou ceou blurejo à faire gaou  
E la toco.

Lei teoule, souto lou casteou  
Que tremouelo,  
Saoutiejon coumo un troupeou  
Sus lei couelo.

Ço qu'entrevieou pèr eilalin,  
Sout lei draio  
Es la resclaouvo doou moulin  
Que dardaio.

L'a de joio d'aoubre e d'aousseou  
Sus lei ribo,  
Per çò qu'an devina beleou  
Qu's qu'arribo!

Es l'enfant de l'oustaou que vèn:  
Fagués plaço!  
Vèni aoubilda lou coou de vènt  
Que m'estrasso.

Ai besoun, cowntro leis uiaou  
Avuglaire,  
De m'assousta dins lou faoudaou  
De ma maire!

Ai vougu saouva de la mort  
Ma memòri,  
Dins lou trelus adei laousié d'or  
De la glòri.

E pamens quand lou boues verdis  
Sout l'aoureto,  
Aourieou culi de Paradis  
De floureto!

(La Sartan)

8 juillet 1894

### A la Prouvènço

*Odo recitado au pèd dóu mounumen de Roumaniho en Avignoun*

Es pèr tu que cante, Prouvènço !  
Quand revese toun soulèu d'or,  
Tout ço que fuguè ma jouvènço.  
Me beluguejo dins lou cor.  
Courre ti bos e ti mountagno;  
M'acate darrié ti baragno,  
Coume quand ère pichouinet;  
Dins lou blanc trelus de l'aubeto,  
Arrape ensèn sus li floureto  
La rimo e lou parpaïouinet.

Dintre ti roco ensouleiado,  
Dins lou cèu que bluiejo e ris,  
S'aubouro la roco di fado,  
Aquelo que fuguè moun nis.  
Mi rèire coucha sus l'auturo,  
Dins la bèuta de la naturo,  
N'an que lou clapas pèr toumbèu;  
L'amo di nostre, quand s'envolo,  
Voulastrejo subre li colo.  
Emé li nivo e lis aucèu.

Prouvènço, o maire de ma maire  
Es tu qu'en boufant sus ma car  
Me batejères pantaiaire  
Emé l'aigo dóu Rose clar!  
Es tu que, proche moun auriho,  
Vounvounaves coume uno abiho,  
Quand de Menerbo à Veleroun,  
Jamai desafouga de courre,  
M'enfusave i draiòu di mourre  
En piéutant coume un passeroun.

Se s'aubouran lèu, se nosto amo,  
Abrasado dóu fiò de Diéu,  
Seguis coume un aucèu de flamo  
Li drapèu qu'estrasson li niué,  
Se cridan: - Bataio! bataio!  
Se la santo espaso cascaio  
Dins lou fourrèu, sout nòsti man,  
Es pèr-ço-que sus ti det rouge  
Avèn begu lou sang ferouge  
Di Sarrasin e di Rouman!

Se parlan ta lengo adourado  
Pertout, de liuen coume de près  
Emè nòsti labro daurado :  
De la cansouneto dóu brès,  
Es pèr-ço-que li pàuri vièio,  
Nous disien ta gènto Mirèio  
Amourouso de Vincenet  
Dintre lou tèms que sus sis anco  
La fielouso de sedo blanco  
Se debanavo plan-planet!

Se nosto cansoun triounfalo  
Ounte la joio s'espandis,  
Lando coume un vòu de cigalo  
Dins lou cèu negre de Paris,  
Es pèr-ço-que siés jamai lasso  
De faire espeli nosto raço  
Dins li poutoun d'or dóu soulèu  
E que nous as dins li parpello  
Vuja la glòri dis estello  
Coume l'òli dins lou calèu!

Zóu! li poung fa pèr la batèsto,  
Li cambo au pitre di chivau.  
Sarian belèu li troublo-fèsto,  
Li cercaire de lausié faus,  
S'avian pas vist sus ti mountagno  
Lis óulivié, li blad d'eigagno  
Proufetisa la grando pas  
Emé si branco clarinello,  
Tremoulant coume de dentello  
Darrié l'espalo di roucas.

Oublidarian bessai la terro,  
S'èro pas dins l'èr siave e dous  
Enca risouleto coume èro  
Au jour de sa proumiero flous;  
Mai lou mèu de la grando souco .  
Es sèmpre encaro sus ta bouco  
Dins li trelus e dins lou vènt;  
L'aubo en se levant te poutouno  
E la bèuta de ti chatouno  
Abrasò lou cor di jouvènt!

Ges d'esclùssi pèr ta memòri!  
Quau t'aclapara dins lou trau  
Aro que t'abéures de glòri.  
Au dive sourgènt de Mistrau;  
Aro que Félix Gras te canto,  
Aro que Roumaniho encanto  
L'amo de ti fiéu negrinèu  
E qu'au dardai di souleiado,  
A pleno labro l'as manjado,  
La Mióugrano d'Aubanèu?

Soun de maufatan e d'arlèri,  
Aquéli que, lèu desmama,  
Sabon plus dins ti cementèri  
Jougne li man e lagrema;  
Aquéli que t'an mespresado,  
Que volon plus segui li piado,  
Pèr lou camin di parpaïoun,  
E que, renegous de si paire,  
An crento de parla, pecaire  
La lengo de ti pastrihou.

Prouvènço, o terro benesido!  
Nàutri t'aman sèmpre que mai,  
Coume la blanco margarido.  
Amo lou poulit mes de mai!  
T'aman d'uno amo libro e fiero  
Sagata sout ta bandiero:  
Lou que te sarié pas fidèu,  
Pèr-ço-que la Franço sacrado  
T'a dins sa courouno estelado  
Coume lou Ventour e lou cèu!

E t'amaren ansin, Prouvènço,  
Enaura pèr crida toun noum,  
Li dous pèd dins ta draio, sèns  
Plega dóu cor à di geinoun,  
Tant que lou vènt, la mar qu'afloco,  
Cantara à travès di roco  
Li glòri dis ome e di diéu,  
Tant que veiren, joio nouvialo  
Flouri dins ti man celestialo.  
La grando roso dóu soulèu.

### La fin de la fiero

La fiero de la Plano duro encaro: aquelo de la politico va sus sa fin. Dins uno coumo dins l'autro si fa foueço brut, si couiouono lei gènt, si vènde de paraulo de breguetian, mai es subretout dins la politicaio que lei charlatan e lei dansaire de couardo fan lou mai d'estampèu. Tout çò que mi counsuelo un pau es de vèire que lei telo pintado s'estrasson dins lou vènt que boufo d'en partout. Lei boues, mounte soun quiha lei barjo-mau, trantaion coumo de fueio. La dóururo dei mantèu foute lou camp de tout caire. Mi souvèni que, d'en proumié, quand èri deputa tout fres tira de l'urno, lou pople avié encaro pèr nautre uno afuscacien que nous empuravo. Quand passavian dins lei carriero, disien: "Tè, vaquito lou deputa!". E tambèn l'anavon d'un coup de capèu. Aro, quand nous saludon, es tout just perqu'avèn pas fa fourtuno emé lei sòu dei paure en trafegant dins leis afaire. Mai si vis que l'a plus, dins lou salut, la fisanço dins l'idèio, la cresènço à la realisacien dóu prougrès pèr lou mouien dei Chambro. Si n'es tant passa de bordelage aquito dintre! Si n'es tant marcandeja de counsciènci! Si n'es tant begu de pechié de vin! L'a tant de gourrin que pèr rabaia un malerous pouarto-fueio an renega tout çò qu' 'avien proumés.

Aurié fougu, au pople, un bon cargamen de couiouunìgi pèr pas s'avisa qu' aquélei bèu moussu si garçavon d' éu sus soun nas!

Tambèn, aro que leis a vist au chantié sarié pas facha de li faire resquiha lei platèu soutu lei pèd...

L'a pas loungtèms que nous an fourja uno pichouno lèi. La cuneissès? Sus lou simple rapportàgi d' uno basaruto que l' aurés pas fa bouqueto un jour de grossso susour, recebrés la vesito de moussu lou coumissàri enribana de sa caussano que vous tafurara dins vòuestei papié e garçara l'escaufèstre dins voueste oustau, despuei la groto fin qu' au galatas.

Se vouesto frumo vous a escri que vous mando uno babeto bèn caudo, se vous a di de-long de soun papafard de famiho que lou viàgi duro un pau troup, que si languisse, que lou badaiun vèn de l' aganta e que vous esquicharié sus soun piés coumo uno

panisso, eh, bè, lou gros encaussana si lipara lei barjo d'aquélei secret e si figurara que l'es... Bougre de “petit polisson!...”

Es aquito que n'en sian vengu. Quand li va diguèri, à la Chambro, que farfouia von dins lei letro de marida, aquéleis arlèri si crebèron de rire. (Dùvi mume vous dire, en passant, que lei fai toujour rire quand li parlas de cavo que farien ploura. Un jour vo l'autre publicarai, bessai, un libre qu'aura pèr ensigno: “On rit” e mounte degrunará uno istòri de doulour souto la fraso que leis a fa estrassa de joio). La parentèso clavado, faou counveni, anen, que vènon aqui, de nous semoundre uno lèi que Carlo-Magne n'en aurié pas vougu, à rapport que, quand mandavo lei gènt à l'escolo, èro pas pèr leis encafourna dins lei presoun. Tout es devessa, leis encian republican an fa coumo lei chambre: van en arrié. E se l'avié rèn qu'élei pèr representa la Republico, auriéu crento de mi dire encaro republican! Ah, ma pauro Mariano coumo t'an desavia! Eres uno bello piéusello, ères fresco coumo l'aigo de la mar, bello coumo un pantai, emé toun pichoun calot rouge que semblavo uno flour espandido sus ta tèsto que fasié revira lou pople, e aro, pecaire, se landon pas lèu, lei joueine, sàbi pas sus quintou moulin jitaras toun bounet!

Es pèr tout acò d'aquito que lei deputa, mume leis ounèste, perdon la glòri e soun quasimen plus degun eis uei dei bravei gènt que li garçon tóuti dins la mumo saco. Es pèr acò tambèn que la fiero va s'acaba. L'a quaucarèn pèr l'èr, es un nouvèu mistrau que si lèvo, la chavano es pas luen e lei blad pendouelon dóu caire d'aquélei qu'an ges de pan. Va veni, la meisoun santo. Tótis aquélei qu'eimon soun pèis e l'Umanita, fouero de tout drapèu politico, vien bèn que tout craniho e que l'a souto terro quaucarèn que mounto.

Tout ço que voulèn es que la justici s'esparpaie e demandan pas sa coulour au parpaioun. Lou sang a troup giscla, nous fòu la pas, la grando pas pèr nàutrei e pèr tóuti, perqué leis ome, de mounte que vèngon, van tóuti à la mumo egalita dins la sourniero dóu toumbèu.

Lou tout es que la marrido fiero fenisse pèr fin que lei maufatan de tóuti lei parti, blu, blanc vo rouge, disparèisson à la benvengudo dóu soulèu.

Veirés que li seren tóuti à faire lou brandou sus la plano Sant-Michèu, lou jour que l'idèio, coumo Lazare, si levara de sa

caisso de mouart, e troumpetara lou mourtalàgi dei poulinchinello de la darniero Fiero politico.

(La Sartan, 8 setèmbre de 1894)

- - -

1895

### **Lei poutouno**

Pantaiàvi de-long lei draio,  
Viguèri dins lou valoune  
Pròchi l'aiguento que cascaio  
Tout un vòu de parpaionet.

Bello farandoulo estivalo!  
N'en avié de touto coulour;  
E la fresqueto de seis alo  
Venié de l'eigagno dei flour.

Ero tout un vòu de poutouno  
Que s'èro facho parpaion  
Sus lei bouqueto dei chatouno  
Calignairis d'aquéu valoun.

Au bèu mitan dei margarido,  
N'en viguèri qu'èron blu,  
Emé l'aleto trefoulido  
Mounte dardaiavo un belu.

Vers la couelo, sus lei flour raro,  
N'en viguèri doues de tout blanc  
Que semblavo dins l'aubo claro,  
Doues ièli dubert s'envouelant.

Oh! queto joio! lei floureto  
Qu'un ventoulet venié bressa  
Si durbién coumo de bouqueto,  
Rèn que de lei senti passa.

Un venguè puei qu'èro tout rouge,  
Tout rouge e pamens tant poulit!  
Ero aquéu deis amour ferouge,  
Aquéu que faguèri 'speli...

Au soulèu, dins l'aureto siavo,  
l'aguèri lèu recouneissu...  
Pecaire! la flour tremoulavo  
Quand si li pausavo dessus.

- - -

Paris, 28 de setèmbre 1896

### **La margarido**

Passave. Uno margarideto,  
Doulènto coume un cor dubert,  
S'escoundié, quasimen souleto  
Dins lou bos verd

Ié diguère: - Perqué, ma bello,  
O sorre dóu grand iéli blanc,  
Escoundre ansin toun rai d'estello  
Tout tremoulant?

Me respondè: - Galant troubaire,  
La flous fai pas tout ço que vòu;  
Me tène escoundudo, pecaire  
Pèr ço qu'ai pòu

Que la chato de la bastido  
Me cueie en cantant sa cansoun,  
E que la pauro margarido  
Ié digue noun!

---

1897

### A Pau Arèno

Nosto Areno, ô dive cantaire  
Que fasiè tant joio d'ausi,  
Espincho un paou d'aqueste caire:  
Ei nàoutri que sian pereici!

Ié, soun tóuti, li cambarado!  
Tóuti, coumo se n'en plouviè;  
E sèmblo un voou de couquiado  
A l'entour d'un grand óulivié!

Flous natalo! Aoubo risouleto!  
Toun paire, quand erès pichoun,  
Fuguè gardian de tis aleto  
Au coulège de Sisteroun.

La gàbi t'encantavo gaire:  
Vouliès t'envoula dins lou vènt...  
Mai èro pas crudèu, toun paire!  
E lou bon vièti se n'en souvèn.

Quand revenguè vers soun Adèlo,  
Lis ai encaro tóuti dous!  
Poudiè pas saoupre qu'uno estello  
Douraiè touon trouon glourious.

Cadun a soun fai sus l'esquino;  
L'Estièu porto déjà l'ivèr:  
Eu faguè de bello farino  
E tu faguères de beù vers!

Aro l'estello s'ei levado  
Sus ta vilo e sus toun oustaou:  
Dins la draio, souto ti piado,  
Li lausié pousson, imourtaou!

Me disiés: - Aqueou que travaio,  
Que vèn, que bouffo, aoura soun tour.  
Siéu semenaire de medaio...  
Si retrouvaran quàouqui jour...

Que toun oumbro siegue tranquilo!  
Li gardaren coumo un tresor;  
Se li souspesavo, Viergilo,  
Veirié leù que soun tóuti d'or!

Lou cèu dardaio dins ta velo!  
Siés lou Latin, lou bèu Latin!  
Ame ta fraso clarinello  
Coumo un ièli dins lou matin.

Ero talamen de la raço,  
Aviés tant lou beou sang de Diéu  
Que si cantaves coumo Ouraço.  
Tambèn roundenaves coumo éu!

Petejaves, fasiés l'empèri,  
Ié anaves d'un cop de gousié  
Quand li faou mascle e lis arlèri  
Rapugavon dins toun lausié.

Mai t'apausaves lèu de dire  
Ço que t'enfialavo lou fiéu:  
Eres aqui te fasiéu rire!  
Un ourso que manjo de mèu.

Eres encaro un paou, pecaire!  
Coumo floureto aou mes de Mai:  
Sian de troubaire, e li troubaire  
Soun galejaire que noun sai!...

Tè, vè! L'ase de Jan de Figo  
Cambaralejo amount dins lou céu!  
Se lou mountavian un paou, digo,  
Perque volo coumo un aucèu?...

Ges de paio, se reguignavo!  
Am 'éu, quiha sus soun péu doura,  
Amarian dins l'aoubeto siavo  
Vers lis astre que soun de flous!

E, foro l'oumbro e lou susàri,  
Esbriauda dóu grand calèu.  
Cacarucharian sis ensàri  
Emè lei figo doù souléu!

- - -

1897

### **Li calignaire de Menerbo**

Au tèms di floureto dins l'erbo,  
Quand lou cèu dardaio tant dous  
Li calignaire de Menerbo  
Mounton la colo, dous pèr dous.

Lou vilage au roucas se quiho,  
Emé si camin qu'amoundaut  
Virejon coume la couquiho  
Sus l'esquino d'un cacalaus.

E ié van, l'amo entrefourido,  
Perço qu'à niue, dins lou sournas,  
Li bouco faran la culido  
Di poutounet, long di pradas.

En pleno routo, à l'arribado,  
Davans lou cèu tout descubert,  
Lou bal aubouro soun estrado  
Enribanado de bouis verd.

Gai! Gai! La jouvènço s'amuso.  
Li mascle viron, fan li bèu,  
Engaubia dins sei blodo bluso  
Que boufon coume de drapèu.

Li chato, avenènto, fresqueto,  
Gènto, poulido mai que mai,  
Voulestrajon, e si bouqueto  
Soun coume de roso de mai.

Zóu! Li vaqui dins li caire;  
Fan l'aleto emé li jouvènt...  
E li parèu de calignaire  
Se dison tout ço que ié vèn.

- Iéu te vole, Margarideto!  
- Te vole tambèn, darnagas!  
- Mi dounaras dos poutouneto  
Sout lou moulin de Soubeiras?

- Saras ma femo, digo, Nino?  
- Mai à toun oustau, tei parènt  
Sèmblo que fan marrido mino?  
- Se volon pas, si raubaren!

Pièi, s'entornon à si bastido,  
Lou cor galoi e tout risènt  
De la journado benesido  
Que vènon de caligna 'nsèn.

Mai vous dirai, n'i a quauquis uno  
Coutigado d'eici, d'eila,  
Que s'arreston au clar de luno,  
Un pau mai que fau, dins li blad...

- - -

Sant-Roumié de Prouvènco, setèmbre 1898

### Lou rèire

Avèn lèu vueja noste vèire,  
A lèu fugi l'aubo que ris;  
E tambèn me vejaqui rèire,  
La barbo blanco e li péu gris!

Mai, souto lou vènt que m'estrasso,  
Dins l'esvalimen de mi flous,  
Me plagne pas de la vidasso  
Nimai d'agué pourta ma crous.

L'èr canto, l'eissame vounvouno,  
L'auceloun niso à moun cyprès,  
Desempièi qu'aquelo pichouno  
Ei risarello dins lou brès.

Canteje coume uno cigalo,  
Me trefoulisse coume un gus  
Quand m'escalo sus lis espalo  
Emé si petoun tóuti nus.

A de gautouno roundelet  
Que sèmblon douz fru Sant-Janen:  
Se sabias coume ei poulideto,  
N'en sarias peréu fouelo, anen!

Souto lou velous di parpello,  
Sis iue, nega d'un trelus clar  
Bluiejon coume lis estello  
Dins l'aigo lindo de la mar.

Sa bouqueto que jamai crido  
Vous baio de bon poutounet,  
Talamen fresco e bèn flourido  
Que ié vèn lou parpaiounet.

Sis auriho, tant roso e blanco,  
Vous fan pantaia, quand li vias,  
I couquiho de la calanco  
Que blanquejon sus li roucas.

Soun front, quand clino sus mi pajo,  
Ié jito un dardai celestiau;  
Enjusco au mentounet qu'assajo  
De rire emé soun pichot trau!

E jogne li man tre qu'arrivo,  
Coume se lou diablas que siéu  
Vesié, peramount dins li nivo  
La fàci d'un ange de Diéu.

Paris, avoust 1899

### **Lou bèl antan**

*Pèço tirado dis “Oulivado”*

Ero d'annado benesido!  
Lou pople fasié bono vido;  
L'avaras largavo si sòu;  
Li gus remavon i galèro...  
Acò se passavo sus terro,  
L'an di semano à tres dijòu.

Tout pèr l'idèio! res à vèndre!  
Li bello-maire emé li gèndre  
S'espoutissien pas sout li cop;  
Cadun se moustravo coume èro.  
Acò se passavo sus terro,  
L'an di granouio emé de co.

Tarascoun èro sèns Tarasco;  
Tout Veleroun fasié si Pasco  
Davans l'autar plen de belu;  
Courounavon Nana rousiero...  
Acò se passavo sus terro,  
L'an que Tistouno parlè plus.

La pas èro dins la famiho;  
Lou riche e la santo pauriho  
S'espinchavon plus de travers.  
Lou blad pèr tóuti sus lis iero!..  
Acò se passavo sus terro,  
L'an que Gras faguè 'n marrit vers!

Davans la mastro, emé li g  rri,  
Li cat dansavon; li nout  ri  
Empourtavon pas lou saquet,  
Li laire fugissien li fiero...  
Ac   se passavo sus terro,  
L'an que lou Rose se sequ  .

Plus gai qu'un drole apr  s l'escolo,  
Moun paire, au vira de sa molo,  
Nous croumpavo apereilalin  
De bos, de prat, la plano entiero...  
Ac   se passavo sus terro,  
L'an que vengu   d'aigo au moulin.

Plus d'estrado p  r li bramaire !  
Lou fraire ajudavo lou fraire;  
L'amour triounflavo, e li g  t  
Se fasien ni prouc  s ni guerro ..  
Ac   se passavo sus terro,  
L'an que gagn  re tant d'arg  nt!

- - -

Paris, lou 20 d'avoust 1899

### **Lou veje**

Ero uno chato di Baumeto  
Que culi   de flour dins lou prat.  
Li digu  ri: - Sias poulideto;  
Urous aqu  u que vous aura!

Verdissien eila, de tout cr  ire  
Dins la f  sto d'or de l'estieu  
Lei veje ounte li calignaire  
S'en van cassa s  nso fusi  u.

- Se vous plàisi, faguè la bello  
Lei veje servon pas bessai,  
Rèn qu'à faire de canestello:  
Anas davans, vous trouvarai!

Lóugié coume uno cardelino,  
M'en anèri acata lèu-lèu  
Au bèu mitan deis óumarino,  
Liuen dei camin e dóu soulèu.

Li flour se fasien de poutouno;  
Lou vènt cantavo en tremoullant,  
Mai vers lou niset la chatouno  
S'en venié plan, fouesso tróup plan.

Souto l'aiguelo que dardaio  
Dansavo li parpaionet;  
Mai pereilabas, dins la draio,  
Pas l'oumbro d'un coutihounet!

Lou cèu risié, l'ouro èro siavo  
Dins lou boues abiha de rai;  
Mai lou tèms, lou bèu tèms fielavo,  
E la chato venguè jamai!

Lou lendeman, souto la colo  
Si rescountravian vis-à-vis:  
- Chato, es lou camin de l'escolo  
Qu'as dounc pres, que se sian pas vist?

Mi respoundè, lou buste reje,  
Lis iue d'un regrèt ennebla:  
- Perqu'atrouvèssi voste veje,  
Aurias pouscu sibla!

(Armana Marsihés, 1900)

Paris, setèmbre 1900

### A Frederi Mistral

*Après uno vesito au Museon Arlaten*

As fa reviéure aqui, dins la ciéuta sacrado,  
Tout ço que nous es joio, amistanço e soulas.  
La pèiro negrissié, lou soulèu l'a daurado:  
Cadre meravihous i relicle di mas!

Ai segui la Prouvènço au trelus de ti piado,  
Dins l'obro e lou pantai, dins la guerro e la pas;  
Coume s'ères lou fiéu de quauco rèino fado,  
As pourta la Patriò e l'ousta sus ti bras.

O brès dis enfantoun! Santo pieta di rèire!  
Mirèio a retrouva sis aneloun de vèire;  
Vincenet, tout galoi, canto coume un verdet.

Ço que s`èro amoussa lusis coume uno estello;  
E vejaqui ma grand que mounto, sounjarello,  
Li labro enca flourido e la fielouso i det !

1900

### **Pèr durbi**

“Lis Oulivado”, voulume en preparacioun

Même quand l’oulivié, ‘mé si branco clafido,  
Semblavo d’argènt viéu sous li vènt maufatan,  
Sèmpre la maire-grand, ma santo benesido,  
Nous disié: - N’auen mai ges d’oulivo aquest an!

Pièi quand, sobre la colo, avié fa sa culido,  
L’óli, pamens cantavo au fiò, dins la sartan,  
Dardaïavo, rai d’or, dins la gerlo ramplido,  
Flamejavo, tambèn, sus li calèu d’estam.

Ieu perèu i’ a de fes que fau mis óulivado,  
Mai que plagne jamai, bono o marrido annado,  
Auriéu-ti quàsi rèn dedins moun canestèu.

Me fau qu’un tros de pan, lou travai me lou baio;  
E tout ço que souvète es, quand moun òli rai,  
Que souto li coufin giscle un pau de soulèu!

(Armana Prouvençau)

Paris, óutobre 1900

### **Li bon flèu**

La Prouvènço risié coumo uno bono maire;  
L'óulivié pourgissié lou rampau de la pas,  
Mai lou mistrau boufavo, e, i'a de fes, pecaire!  
Que pèr pas resquiha, m'arrapave i roucas.

Dins lou brut di carreto e dóu Rose cantaire,  
Lou rasin negrejavo au mitan di campas;  
Mai li mouissau venien, e li bèu vendemiaire  
Repartissien subran, si canestello i bras.

E lou mistrau m'a di: « Moun obro ei pamens santo:  
« Fau fugi dóu païs ounte tout luse e canto  
« La pèsto e lis anglés, que van dóu meme vòu »

E li mouissau m'an di: « Tè! la terro ei proun largo.  
« Sian li mèstre: voulèn ges de vigno en Camargo,  
« Perço que la Camargo ei rèn que pèr li biòu! »

(Armana Marsihés, 1901)

Vilo-muro, setèmbre de 1901

### Fèlis Gras

La Prouvènço l'eimavo, èro soun bouen cantaire;  
Ero aquéu que s'en vai, tout daura de soulèu,  
Mescla sa puro vouas ei nouvè dóu terraire,  
Vendemia de pantai dins la vigno dóu Bèu.

Dins soun pitre galoi, l'amo de nòuestei paire  
Durbié tutto sa flous à la glòri dóu cèu;  
Lei fado d'Avignoun l'avien pèr calignaire;  
Vivié que pèr canta, coume fan lis aucèu.

Disié la santo pas e tambèn la bataio;  
L'espaso bouleguè, pendoulavo ei muraio,  
Lou jour que l'aguerian prouclama Capoulié.

Aro que lou linçòu enmantello seis anco,  
Ausiren dins la niue, sauto sa pèiro blanco,  
Rire lei damo gènto emé sei chivalié.

(Armana Marsihés 1902)

Vilo-Muro, setèmbre 1901

### **Li meichant**

Mai perqué i'a subre la terro  
Tant d'ome que soun meichantas?  
Perqué sèmpre la malo guerro?  
Perqué jamai la divo pas?

Regadas: la naturo canto  
Jogo, verdejo, s'espandis  
E tout ço que fai nous encanto  
Couume un pantai de paradis.

Dins lou bos negre, la nisado  
S'endorme la niue sèns esfrai;  
La roso ris couume uno fado  
A l'aubo que jito si rai.

Uno bounta plòu dis estello;  
Es pas pèr se plagne au soulèu  
Que l'aigo sourno o clarinello  
Meno soun brut dins li canèu.

L'aucèu, que se fai pas de rènto,  
A la fe dins soun endeman;  
L'ourtigo demoro innoucènto  
De nous agué pougnou li man.

Quand l'ourriblo grelo es vengudo  
Tout chapla sout li nivo gris,  
La bravo dindouleto ajudo  
Sa sorre à rebasti lou nis.

Se n'èro pas la fam crudèlo  
Que li lardo soutu la pèu,  
Li loup, pietadous is agnello,  
Caminarien dins lou troupèu.

Peréu lis agneleto blanco,  
S'espassejant foro di mas,  
Leissarien la fueio à sa branco,  
L'erbo e sa floureto i pradas.

Mai mounte es la fam que li pougno,  
Li marridas, lis envejous,  
Quand s'encagnon sènso vergougno  
A nous clavela sus la crous?

Soun-ti tant fourca de mau faire  
E de nous fiela noste dòu,  
Que ié fauge aqueira si fraire  
Emé li pèiro di draïou?

I'a pèr cadun proun de misèri,  
Meme quand nous sentèn ama,  
Sènso qu'uno bando d'arlèri  
Nous fague encaro lagrema!

La vido a proun d'òrri journado  
Pèr l'ome nascu simple e dous,  
Sènso que vèngon de si piado  
Enfanga sa darriero flous!

Marridarié de la fourtuno!  
N'en counèisse qu'an forço argènt,  
Mai d'argènt que cènt rai de luno;  
E fan de mau i pàuri gènt!

An tout: la mouié bello e puro,  
Lis enfantoun, li bon lesi,  
L'esperit, la glòri que duro;  
E fan lou mau pèr lou plesi!

Sabon-ti plus que fau se jaire  
Vuei o deman sout li ciprès?  
An dounc jamai agu de maire  
Pèr lis endourmi dins lou brès?

Si cor que soulet lou sang bagno  
Soun pas même un tros de roucas:  
Li roucas plouron dins l'eigagno  
Emé li roso di bouscas.

I'a pamens lèu dos milo annado  
Pèr la doulènto umanita  
Que la bounta, crucificado,  
S'estello dins l'eternita!

---

Embrun, 21 d'avoust de 1903

### **En Embrun**

Desempièi quàuquis annado,  
Sus li piado  
Di fadeto, i roucas brun  
Vène lampa l'èr que bagno  
La mountagno  
Dins la viloto d'Embrun.

Ié vène, quand la naturo  
Es tant puro  
Que la bürrias dins la man  
Coume uno aigo que s'estello,  
Bono e bello  
Pèr la joio dis uman.

Iéu qu'ai mestié de n'en faire,  
(Oh! pecaire!)  
Counéisse plus qu'uno lèi:  
Es de viéure la souleiado  
Dos mesado  
Coume s'ère un pichot rèi.

Ma Jano ei la rèino Jano  
O chavano,  
Pos boufa coume voudras,  
Tant qu'avèn la margarido,  
Bèn flourido  
Au soulèu, dins lou pradas!

Fau cade jour sus la plaço  
Ma radasso  
L'iue beluguet d'un pantai,  
L'amo touto perfumado  
E bressado  
Dins un lié trena de rai.

Dins lou vènt que li poutouno  
Li chatouno  
Dison d'un èr d'angeloun  
- Es éu mouussu que cueio  
Flous e fueio  
Pèr n'en faire de cansoun!

Souto lou cèu que dardaio,  
La font raio  
En un tant linde sourgènt  
Qu'en ié trempant si manoto  
Li pichoto  
Sèmblon boulega d'argènt.

I'a perèu sus la placeto  
Poulideto,  
Un cafetoun risoulet  
Ounte nous countan d'istòri  
En memòri  
Dóu paure Cascarelet!

Aqui ges de poulitico!  
Republico,  
Mouriras pas d'aquest cop!  
Ei nautre que sian li mèstre,  
Quand pèr l'estre,  
Avèn qu'à leva li got!

Pièi regarde li grand mourre  
O ié courre,  
En esperit, lèu e lèu,  
Pèr vèire se la man toco,  
De la roco,  
Li belugo dóu soulèu.

Quand en desplegant sa raubo.  
Damo l'Aubo,  
Lagremejo o fai semblant,  
Vese neva sus li colo  
Ounte volo  
Uno pousso d'iéli blanc.

Tout flamejo sus l'auturo,  
Tant que duro  
Lou jour siau e benesi,  
E s'ausis ploura li sorgo  
Dins si gorgo  
O la pinédo brusi.

Quand la niue toumbo o davaloo.  
Si dos alo  
Soun roujo coume d'uiau,  
E dirias que dins li nivo  
Diéu e divo  
Galopon sus si chivau.

La mountagno sounjarello  
Empestello  
Lou calice d'or di flous  
Au tabernacle dis astre  
Que li pastre  
Feston d'un cant pietadous.

Dins la bèuta dis estello  
Clarinello,  
Lis Embrunés van pèr vòu  
Jouga de la mandoulino  
I vesino  
Coume s'èron d'Espagnòu.

Tout es musico, tout canto,  
Tout m'encanto  
E lou cor me reflouris.  
Ah! Que me coupon la tête,  
Malo-pèsto,  
Se sabe mounte es Paris!

1903

**Pèr Albert Tournier**

En remembranço de sa decouracioun dins la Legioun  
d'Ounour

As canta la bèuta di chato dóu terraire,  
Pèr-ço-que de canta t'èro salubre e dous;  
L'ivèr coume l'estiéu, te siés fa semenaire  
Dins la rego duberto i soulèu pouderous.

Eres lou tambourin e lou tambourinaire  
Quand farandoulavian dins l'erbo e dins li flous:  
Pièi, se voulien rauba lou drapèu de ti fraire,  
Te batiés pèr l'idèio, estènt soun amourous.

Es pèr acò qu'un jour dins l'èr que luse e volo.  
Un parpaïouonet rouge es arriba di colo  
S'espingle sus toun pitre, urous e trefouli.

Mai ço que i'a de bèu, ei que, se li cigalo  
S'arrestavon de naisse en terro prouvençalo,  
Rèn qu'en levant lou det, li fariés espeli.

Ambrun, 1é de setèmbre de 1904

### A ma nèço Camiho Marin

Aro qu'avié dins l'aubo siavo  
Bèn samena,  
Aquéu que t'aimavo e t'aimavo  
S'es ana!

S'es ana d'aquesto vido  
Emé soun païs  
L'amo enca touto trefoulido  
De soun pantai!

Dins voueste jardin, pas d'ourtigo:  
Rèn qu'un rousié!  
Ero aqui, ti disié: Ma migo!  
E sourisié.

Sa pensado sèmpre galioio  
A faire gau,  
Desbanavo sei fiéu de joio  
Dins toun faudau.

Aimavo e lou plouron, pecaire!  
Tout tremouelant,  
Lei pàuri vièi que disien: Paire!  
En li parlant!

Aimavo la Santo Prouvènço,  
Lei bèu sourgènt,  
Leis óulivié de sa Prouvènço  
Bagna d'argènt.

Aimavo la grando chavano  
Dins lou cèu clar,  
Lou mistrau que vèn de Maiano  
O de la mar.

Aimavo lei cansoun, lou rire,  
Lei flour, lei rai;  
Mai t'aimavo - qu'es pas pau dire -  
Encaro mai.

Aurié pèr tu qu'ères sa bello,  
Sa part de Diéu,  
Baia lou grand cèu plen d'estello  
S'èro esta siéu.

E lou velaqui dins la terro,  
Souto la crous,  
L'espous, lou paire, l'ome qu'èro  
Tant pietadous!

Sèmblo, quand la mouart nous lou raubo  
Qu'es pas verai!  
E sei pichoun qu'èron soun aubo,  
Soun mes de mai.

Soun Marinet que sei parpello  
Batién tant dous,  
Quand li disié lei blànquei velo  
Vo lei buou rous!

Soun Beset poulit coumo un astre  
L'escoutant bèn,  
Quand li racountavo lei pastre  
De Betelèn!

Puei, quand tissavon lou suàri,  
Sa Magali  
Que dins la tempèsto e l'auvàri  
Vèn d'espeli!

L’as lèu perdu, ma nèço aimado,  
Toun Paradis  
Souleto à baia la becado  
A tout lou nis!

Lou paure es lèu ana si jaire  
Vers lei ciprèses;  
E n’a leissa rèn que la maire  
Davans lei brès.

Tei mignot, fraire dei cigalo  
Imàgi d’eu,  
Leis acataras sout teis alo,  
Coumo si dèu.

Pèr li reviha sa pensado  
Dins l’esperit,  
Li legiras à la vihado  
Sei bèus escrit.

Li rediras l’amour que canto  
Avans lou dòu;  
E quand auras fa, maire santo,  
Tout ço que fòu.

Maugrat la mouart que nous separe  
Sènso resoun  
Lou regardaras viéure encaro  
Dins sei pichoun!

(Armana Marsihés 1905)

Ambrun lou 4 de setèmbre de 1904

### A Madamo Pau Rossi

Despièi qu'avès perdu voste enfant, lis annado  
S'en van sènso soulèu e sènso mes de mai.  
Se sian aqui, pamens, vosto pauro pensado  
Se duerb à l'amista coume la flour i rai.

Sènso vous desmama de la doulour sacrado,  
Sèns trop leva la tèsto e rejita lou fais,  
Counsentès un brisoun à segui nòsti piado  
De long li caminet qu'estello moun pantai.

Vosto joio e la nostro an meme èr de famiho:  
La roso que cueien procho vous sus l'Aupiho  
Nous fai pas, noblo amigo, óublida lou ciprès.

Mai lou Diéu que pregas es lou grand counsoulaire,  
E fau vous dire un pau, en plagniguènt sa maire,  
Que s'avès uno toumbo, avès peréu tres brès.

(Armana Marsihés de 1905)

Embrun, 5 de setèmbre de 1904

### A ma mouié

Cantejave un pau, ma bello  
A ti geinous,  
Dins lou parla de Santo Estello  
Tant ufanous?

T'ai cènt cop di, liuen di bataio,  
En franchimand  
Que m'as baia tout çò que baio  
Bonur uman.

Eres enca tutto pichoto  
Que mi cansoun  
Voulastrejavon, papihoto,  
Vers ti frisoun.

E, zóu! de balans sus li cimo  
A faire esfrai  
Ere bèn paure; mai la rimo  
L'èro ben mai.

La primo fes que te veguère  
Quéti raioun!  
Eres la floureto e fuguère  
Lou parpaioun.

Virave d'uno alo lóugiero  
A toun entour  
E me pensave qu'acò n'èro  
Deja l'amour?

M'èro cavo tant celestialo  
De t'espousa  
Que metè proun de tèms moun alo  
A se pausa.

Avèn, despièi, viscu la vido  
Coume nous vèn,  
Bono souvènti-fes, marrido  
Pas tant souvènt.

Quand ai lucha dins la rafalo,  
Duerbes ti bras,  
Ma tèsto clino à toun espalo  
E siéu plus las.

N'ai qu'à touca dins la sournuro  
Toun front reiau  
Pèr avugla li facho duro  
De mis uiau.

I'a tant de gus que fau pas crèire  
De li coumpta:  
Ai fe pamens entre te vèire  
A la bounta.

Siguèsse soulamen pèr rire,  
Sènso amarun,  
Jamai, jamai t'ausère dire  
Mau de quaucun.

Toun amo es tant puro e tant auto  
Qu'en s'envoullant  
Desplego sus tóuti li fauto  
Soun mantèu blanc.

Quand la Mort segavo Marsiho  
Dins lou soulèu,  
Te veguèron vers la pauriho  
Arriba lèu.

Aquéli que sus ma peitrino.  
Proche moun cor,  
Avien nousa la cherpo fino  
Franjado d'or,

Eres aqui li labro siavo  
E lis iue dous,  
Mau-grat la pouisoun que trevavo  
Dins l'aire afrous.

Pièi revenguères, afamado :  
De si poutoun :  
Vers la benurouso nisado  
Dis enfantoun.

Venguères peréu, santo esclavo  
Di bèu travai,  
A toun argelo qu'esperavo  
Ti clar pantai.

Cade jour, subre lis auturo  
Bluio de cèu,  
Espeliguè toun obro puro  
Coume la hèu.

Lou cant de la bèuta sacrado,  
Diven poude!  
Lou cantères coume uno fado  
Emé ti det.

Sus la muraio risouleto  
Dins lou trelus  
Aguerian de vòu de floureto  
E d'Amour nus.

Nòsti dos fiho, que soun bello,  
Coume lou jour,  
Nous faguèron lèu, sènso argelo,  
D'àutris Amour.

Quand li chato dien: - L'esculturo,  
Qu'eï mal eisa!  
Anas un pau, santo Naturo,  
Vous ié fisa!

Pèr moudela li nas, li tèsto,  
Vous an un biais!  
Se n'en voulés enca, n'en rèsto,  
E longo-mai!

An quatre enfant, nòsti mignoto:  
Quatre bèuta!  
E nous fai acò vue menoto  
A beisouta.

Nosto Jaquelino, ma flòri,  
Moun angelet,  
Que me dis: - Conto-me d'istòri!  
Quand sian soulet,

E que me fai milo remarco  
Sènso repaus  
En regardant ma Jano-Darco  
Sus soun chivau!

Noste Pierrot, ma fino caio,  
Moun béu farda,  
Que vòu, desempiéi qu'a li braio,  
Se marida!

Noste Yvet que l'aubo emmantello,  
Noste Glaudet  
Que trouvaran li damisello  
Tant poulidet!

Quèntis Amour nòsti chatouno  
Nous an baia!  
Siés la rèino, soun ta courouno:  
Alleluia!

Mai tant siegues la Rèino-maire  
Que ié falié,  
Lis annado te tocon gaire,  
O ma mouié!

E coume s'ère un beau troubaire  
Sèmpre galant,  
Es acò qu'ai vougu te faire  
Ausi plan-plan,

En te lou cantejant, ma bello,  
A ti geinous  
Dins lou parla de Santo-Estello  
Tant ufanous.

- - -

Ambrun, lou 21 d'avoust de 1905

### **La vido**

La vido ei cavo d'uno ouro,  
Quouro, quouro:  
Toumbaras que dins lou trau.  
Arrives, la mort arrivo:  
Sus lou nivo  
Duro encaro mens l'uiau.

Is auturo celestialo  
Durbèn d'alo  
Coumo d'aiglo vo d'eigloun.  
Lou vènt boufo de tout caire  
E pecaire!  
Erian que de parpaïoun.

Mai se sus nòstis aleto  
La floureto  
A bressoula soun pantai  
Poudèn dire à la naturo  
Siavo e duro:  
Avèn viscu mai que mai.

(Armana Marsihés 1906)

- - -

Embrun, lou 26 d'avoust 1905

### **Pas senatour!**

M'ère mes dedins la tèsto,  
Quento fèsto!  
Que me farien senatour,  
Sèns regarda se ma pансo  
A prestanço  
E merito un tal ounour.

L'amo sèmpre ensouleiado,  
Vint annado,  
Aviéu, proche o liuen dóu nis,  
Representa, sènso faire  
L'esbroufaire,  
Tant Marsiho que Paris.

Poudiéu bèn sènso arrouganço,  
Santo Franço!  
Avans d'esclapa mis os,  
Estre lou bon patrioto  
Pèr quau voto  
Li Baumeto emé li Gros.

An pas vougu; mai soun flame  
E lis ame,  
Pèr-ço-qu'ame moun païs,  
Moun païs ounte la vido  
Es poulido  
Coume un rousié que flouris.

Pèr li rabaia, pecaire!  
De tout caire,  
De la vilo au vilajoun,  
Ai, dins lou mistrau que volo  
Sus li colo,  
Landa coume un fouletoun.

De fes m'abihave en ourso  
Pèr mi curso,  
Quand li fasiéu sus l'autò,  
E, sènso agué li man pleno  
De dardèno,  
Aviéu l'èr d'un aristò.

Lis àutri candidat, rouge  
E ferouge,  
Vo blanquet coume la nèu,  
Dins l'envanc de si veituro,  
Is auturo  
Fasien lis ourso perèu.

Quand s'envenian pèr li fiero  
Coustumiero  
Parleja coume falié,  
Cadun prenié nosto bando  
Qu'èro grando  
Pér uno meinajarié.

Iéu, lou miés que m'agradavo  
Ei la siavo  
Oospitalita di gènt:  
Li paraulo èron douceto,  
Risouleto,  
E n'aviéu pèr moun argènt.

Fasiéu ma vesito au mèro;  
Mai coume èro  
De-fes mau luna pèr iéu,  
M'escoutavo, disié gaire  
E, sounjaire,  
Espinchavo soun fusiéu

Ere lou soucialisto  
De la listo,  
E quau saup se tau gusas  
Voulié pas, pèr proumié gage,  
Lou partage  
De sa terro e de soun mas?

Ié flatave: - L'obro umano  
Sara sano,  
Quand res raubara plus res;  
Siéu tambèn proupietàri,  
Pas d'auvàri!  
Amen-nous e beven fres.

- Mi bos an, bèu tèms o plueio,  
Mens de fueio  
Que d'ipoutèco, bessai;  
Mai soun nostre, e sout si branco  
Rèn nous manco,  
Se nous rèsto lou travai.

Lou sant ome alor de rire,  
Sènso dire  
De co qu'èro estouumaca;  
E, davalant vers la cavo,  
Quènti cavo!  
- Ai un pichot vin muscat.

Mountavo emé la boutiho,  
Meraviho!  
Santa dóu cor e dóu piés!  
D'uno telo d'aragnado  
Abihado,  
Lusissié tout au travès.

A la segoundo rasado:  
- Cambarado,  
Sian pas d'ome dóu passat...  
Dourmès sus li dos auriho;  
Lou cèu briho:  
Voutan que pèr l'avança!

D'aquéu mèro! Qu'èro brave!  
N'en badave  
Coume un lesert. E pamens,  
Quand coumtèron li biheto  
Poulideto,  
Manquère d'avancamen.

Ploure pas de l'aventuro;  
La naturo  
Ero bello que-noun-sai;  
Regardave li sourgueto  
Boulegueto  
Argenta li flour de rai.

Pendoulavo di capello  
De dentello  
Qu'èron de ramèu trena  
Vers tout ço que dardaiavo  
E cantavo  
Auriéu vougu m'enana.

Mau-grat ma roujo coucardo,  
Santo-Gardo  
Plan, planet m'apareissié,  
Santo-Gardo ounte à la Vierge,  
Sout li cierge,  
Desfuière moun rousié.

Ta mountagno èro superbo,  
O Menerbo!  
E m'ei douço, meme après  
Que m'an matrassa lis alo  
Sus l'espalo  
Em' un moussèu de moun brès.

(Armana Prouvençau 1906)

Embrun, lou 1é d'avoüst de 1906, pèr li 100 an de la neissènço de  
Vitour Gelu

### A Vitour Gelu

- 1 - Gelu, i'a déjà cènt annado,  
Emé sei flour dins lei bèu mes  
Que, sus ta bouco, l'alenado  
Venguè pèr la proumiero fes;  
Cènt an, que souto lei parpello  
Tei dous uei, buvèire d'estello,  
S'esbrihaudèron d'un trelus  
E que la maire benesido  
Ausiguè douçamen la vido  
Canteja dins toun pitre nus.
- 2 - Mai que t'enchau lou tèms que passo  
Nous matrassant l'amo e la car?  
Siés inmourtau coumo la raço,  
Lou vènt, la mountagno e la mar!  
Tei cansoun de bèu pantaiaire  
Vouelastrejant de tout caire  
Dins lou soulèu e dins l'uiau,  
Tant que blanquejaran lei velo  
Sus l'aigo bluio e clarinello,  
Tant que boufara lou mistrau.
- 3 - Ço qu'empachara ta memòri  
De toumba, moucèu pèr moucèu  
Ço que ti courouno de glòri  
D'an e d'an souto lou grand cèu  
Es d'agué bressoula teis alo  
Dins l'èr de la terro natalo,  
Sènso agué l'esfrai de la mort,  
Sèmpre au mitan de la lumiero,  
Coumo lei passeroun sus l'iero,  
Coumo lei gabian dins lou port.

4 - E tambèn d'agué pèr Marsiho,  
Ardènt, galoi e pietadous,  
Cueihi coumo 'no grando aleto  
Lou mèu de tóutei nòuestei flous,  
D'agué dins leis envanc de l'ouro,  
Celebra ço que ris vo plouro  
Dins la naturo e la ciéuta  
E, maugrat darboun e coulobro,  
D'agué basti touto toun obro  
Emé de troué d'umanita.

5 - Es surtout quand l'or voula briho  
Ei det ferouge dei gusas  
D'agué canta pèr la pauriho  
Lou vin, lou soulèu e la pas,  
D'agué tout de long de la draio  
Emé lou pople que travaio  
Parteja lou pan de l'amour  
E d'agué, dins la bello voio,  
Vueja quàuquei gouto de joio  
Sus lei labro de la Doulour.

6 - Poudiés, o Gelu, bèu troubaire,  
Coumo tant d'autre, mespresa  
La santo lengo de ta maire,  
La cansoun que t'avié bressa,  
La siavo musico latino,  
Puro coumo l'aubo divino,  
Coumo l'eternalo bèuta  
E que sèmblo, souto la fuèio  
Lou brut d'uno pichouno plueio  
Facho de perlo e de clarta.

7 - Lou front aut, la man sus leis anco,  
Lou gardères lou parla dous,  
Coumo lou nis gardo la branco,  
Coumo un Bretoun gardo sa crous,  
Coumo la cimo inmaculado  
Gardo apèr-amount, luen dei piado,  
La blanco nèu en plen estiéu,  
Coumo l'astre gardo sa flamo,  
Lou pescadou sa boueno ramo,  
Lou pastre corso soun fusiéu.

8 - Poudiéss, coumo tant d'autre encaro,  
Ana de tei det ufanous,  
Faire vounvouna la guitaro  
Dins lei saloun, pèr leis urous,  
Parpaionna davans lei damo  
Li coutiga lou pitre, l'amo,  
Emé l'alo dei madrigau  
E souto la couelo sacrado  
Li trena, coumo pèr de fado,  
De vilanello à faire gau?

9 - Aimères miés, valènt cantaire,  
L'esquino drecho e leis uei clar,  
Viéure la vido de tei fraire,  
Davans la bèuta de la mar,  
Escouta sus sei bouco sano  
Lou poulit brut de joio umano  
Qu'en i vouelant fasié toun noum,  
Estre libre, sauta lei cledo  
E l'estiéu, souto la pinedo,  
Aussa toun vèire au cabanoun.

10 - De la Majour eis Eigalado,  
De Sant-Jan à Sant-Barnabè  
Ta grando plumo ensoulihado  
Agué tout Marsiho à soun bè,  
Lou pople emé la poupulaço,  
Lou nèrvi que fai sa radasso,  
Lou peissounié suto soun banc,  
Lou pescadou, crestian candide,  
E souto sei boutèu soulide,  
Lei Tur coueifa de soun turban.

11 - Emé la bounta sus ta faço,  
Sèns t'enfebra pèr lou Lausié  
Cantères touto ta vidasso,  
Dintre tèms que l'aubo risié;  
Diguères lei gus, leis arlèri  
Leis endiabla que fan l'empèri,  
Lei sènso-pan, lei mau luna;  
E ta lengo tant forto e claro  
Quand lou fouguè, dins la bagarro  
Tambèn la faguères trouna.

12 - Es pèr acò, Gelu, bèu rèire,  
Que sus toun aima pedestau,  
Lou pople es revengu ti vèire,  
Dins toun triounfle centenau,  
Que t'adusèn de margarido,  
Que ti cantant, l'amo ravidò,  
E que lou vènt cantant peréu,  
Ti fa, dóu Vièi Port ei calanco,  
Saluda pèr lei velo blanco,  
Suto la mar e dins lou cèu.

(Le Petit Provençal du 9 d'óutobre de 1906)

Embrun, lou 2 d'avoust 1906.

### **La Martino**

O santo enfanço! Urous matin!  
Avian uno vièio vesino,  
Coume èro véuso d'un Martin,  
Li gènt ié disien la Martino.

Ero maigro coumo un clavèu,  
Laido coume un pecat, mau lacho;  
Lis an i'avien tana la pèu,  
E se pagavo de moustacho.

Justamen, de-fes, à l'oustaü,  
Au brut de la molo quo viro,  
Se parlavo de l'inmourtau  
Cantaire de la douço Elviro.

- Ah! Lamartino, que cervèu!  
Queto amo celestialo e puro!  
Si cant sarien sèmpre nouvèu,  
Coume li flour dins la naturo.

I grand jour de quaranto-vue,  
Quand nous cresian tóuti de fraire,  
La Franço entiero avié lis iue  
Sus lou gèste qu'anavo faire.

Avié rèn qu'à leva la man  
Davans li vilo o li cabano,  
Pèr endiga lou flot uman  
Desbardana sobre li plano.

Pourtavo lou drapèu sacra;  
Ero un di gigant de l'Istòri;  
Lou pople qu'avié celebra  
Ié marchandavo pas la glòri.

Mai l'ièli perdié soun prefum,  
L'abiho mourié sus la souco,  
L'oumbro toumbavo, e l'amarun  
Venié lèu à tóuti li bouco.

Lamartino avié plus vint an;  
Soun front s'ero frounci de rido:  
Mounte èron sis amour d'antan,  
Tout embeimado e tant flourido ?

Soun cor saunavo de doulour.  
Vido crudèlo! mort jalouso!  
Quau poudié legi sènso plour  
*Si Counfidènci* pietadouso ?

Escoutave, tout pensatiéu,  
Lou det sout la tèsto que clino,  
E sus sa porto, quand sourtiéu,  
Cercave dis iue la Martino.

Se s'enanaavo, sout li pin,  
Emé sa fauciho embrecado,  
Faire un pau d'erbo à si lapin,  
Seguissiéu pèr orto si piado.

Un matin, coume erian soulet,  
Asseta souto uno baragno,  
Dintre tèms que lou ventoulet  
S'amusavo à seca l'eigagno,

Ié diguère sout moun capèu,  
Tout en la regardant de caire:  
- Qu'avès fa de voste drapèu?  
M'avise que lou sourtès gaire!

- Un drapèu ? me faguè, luroun!  
Mai quete drapèu me vos dire?  
- Lou drapèu sacra, sabès proun...  
E la pauro vièio de rire.

Me teisère un moumenet, pièi:  
- Cantas-me quaukarèn, vesino.  
- Cantan plus, quand se fasèn vièi,  
Me respoundeguè la Martino.

Li pin avien l'èr de prega;  
Li rai dansavon dins la draio.  
Alor, sus l'erbeto alounga,  
Ié prenguère li man, la taio:

Sarrère si det tremoulant  
Qu'avien fa tant de belli cavo;  
Moun regard se pausè, plan-plan,  
Sus sa barbo que m'estounavo,

E souto li branqueto en flous  
Davans, lou cèu, dins lou silènci:  
- Perqué sian rèn que nàutri dous,  
Fasès-me vòsti *counfidènci*...

---

Embrun, lou 8 d'Avoust 1906

### **Lou Sofè\***

Oh! lou sofè de nòsti rèire!  
Capèu coume se n'en fai plus!  
Me sèmblo encaro de lou vèire  
Dins un trelus.

Vaste triounfle de la fèsto,  
Couifavo, vièi o flame-nòu,  
Lis espalo autant que la tèsto  
Dins soun envòu.

Ei pas poulit tout ço qu'agrado:  
Ero long coume un jour sèns pan,  
Meme quand l'avia en pensado  
Rougna d'un pan.

Avié de péu coume uno malo  
Vo coume un pitre qu'a de péu,  
E quétis alo, quétis alo,  
Aquéu capèu!

Quand lou nivo crèbo o s'estrasso,  
Emé pleno segureta,  
Poudias soutu aquélis alasso  
Vous assousta.

De fourtuno pichoto o grossos,  
Li jouinas de nòsti cantoun  
Se lou croumpavon pèr si noço  
A Cavaïoun.

Dins la bastido, uno mesado  
Avans lou repas cantarèu,  
*Lou sofè* fasié soun intrado  
Emé l'anèu.

Coume un santoun souto uno vouto,  
Jusqu'au bèu jour di gai pan-pan,  
Ero estrema, lou pauret! souto  
Quàuqui riban,

Dins uno bouito negro, enormo,  
Espetaclouso d'aut en bas,  
Cartounado segound sa formo  
De capelas.

Mai quand sourtié, zóu! la ninèio;  
“*Lou sofè!*” trasien de crid fòu,  
En courrènt après li dragèio  
Dins li draiòu.

A la darriero vióulounado,  
Zóu mai lou *sofè* dins lou trau!  
E pèr éu jamai d'envoulado  
Dins lou mistrau!

De sa bouitasso entenebrado  
Lou sourtien plus, li bràvi gènt,  
Que pèr festa sa benurado  
Noço d'argènt.

Pèr mena jusqu'au cementèri  
Quauque richas dóu vilajoun,  
Pèr adurre au sant batistèri  
Un enfantoun,

O quand, au tèms dis agrioto,  
Au brut clar di got dins lou mas,  
Maridavon vo la pichoto  
Vo lou jouinas.

Mai ié sourtien tambèn, pecaire!  
Quand soutu li ciprès afrous  
A soun tour anavon se jaire,  
Li bras en crous.

Que n'ai vist, de mort, au village,  
Bèn abiha, quàsi coussu,  
Lou *sofè* de soun maridage  
Subre lou su!

Eres aqui, capèu de noço,  
I clarta dóu mes printanié,  
Tout lusissènt d'un cop de brosso,  
Las! lou darrié!

# L'ŒUVRE LITTERAIRE DE CLOVIS HUGUES

## I : Articles dans les journaux marseillais

### - Le Peuple

Journal politique depuis le 9 août 1868. G. Naquet en devient le rédacteur en chef. Clovis Hugues y écrit pour la première fois le 20 juillet 1870, il y tient la rubrique provençale jusqu'au 23 mars 1871.

### - La République

Journal politique quotidien. Rédacteur en chef: A. Sorbier. Clovis Hugues y collabore dans le courant du mois d'avril 1871.

### - Le Diogène

Journal hebdomadaire humoristique et illustré. Deux numéros seulement, un article de Clovis Hugues le 21 mai 1871.

### - La Fraternité

Journal de la République, ne paraît qu'au mois de juin 1871. Trois articles de Clovis Hugues.

### - La Liberté pour tous

Journal populaire. Ne paraît qu'au mois de juin 1871. Trois articles de Clovis Hugues des 7, 8, 9 juin.

### - Le Vrai Marseillais.

Quotidien. 233 numéros (2 chaque jour). N° 1 le 14 juin, Clovis Hugues y collabore.

### - La Jeune République

Journal quotidien. Clovis Hugues en est le rédacteur en chef jusqu'au 9 mars 1878, date de son départ pour Paris; il reste un collaborateur du journal.

### - Le Petit Provençal.

Depuis le 10 mai 1879, c'est la fusion de "La Jeune République" et du "Rappel Marseillais" racheté par une société composée de "plusieurs députés de gauche et d'extrême gauche. Auguste Thomas en est le rédacteur en chef. Clovis Hugues y collabore jusqu'à sa mort.

## **II : Ouvrages imprimés, reliés en volumes ou en brochures**

### **- Lettre de Marianne aux Républiques.**

Marseille, Imp. Clappier, 1871, 19 p.

### **- Les Intransigeants.**

Paris, Les principaux libraires, 1875, 1 ép.

### **- Poèmes de prison**

Paris, Les principaux libraires, 1875, 63 p.

### **- La Petite Muse**

Paris - Les principaux libraires - 1876 - 215 p.

### **- Chansonnette électorale**

Marseille, Les principaux libraires, 1876, 4 p.

### **- Emission de 240 actions de 25 francs.**

Pour la fondation du "Réveil du Peuple", organe républicain du Midi.

Rédacteur en chef: Clovis Hugues. Prospectus signé Clovis Hugues Bulletin de souscription janvier 1876.

Cavaillon (Vaucluse), 3 p. Ce n'est plus à la B. N.

### **- Pour les ouvriers lyonnais.**

Poésies lues au Théâtre Valette

Marseille, Imp. A. Thomas, 1877, 4 p.le 17 février 1877.

### **- Une nuit de Molière**

Comédie en un acte en vers, représentée au Théâtre du Gymnase à Marseille le 17 janvier 1879, à l'occasion de l'anniversaire de Molière, suivie d'une poésie à Molière.

Marseille, Laveirarié, 1879, 22 p.

### **-14 juillet, prise de la Bastille**

Marseille, Imp. Crémieux, 1881, 1 p.

### **-La Vierge Rouge**

Roman d'amour sous la Commune

S 1 n d, 1881, 143 p.

### **- Les Soirs de Bataille**

Poésies.

Paris, Lemerre, 1882, 171 p.

**- Les Jours de Combat**

Poésies.

Paris, Dentu, 1883, 364 p.

**- Les Evocations**

Poésies.

Paris, G. Charpentier, 1885, 354 p.

**-Le Tambourin**

Pamphlet paraissant les jeudis. Illustrations de Pasquier.

Paris, 1886, 3 impasse Gaudelet, 224 p.

**- Poésies**

Publications à 15 centimes.

Paris, Petite bibliothèque universelle, 1886, 160 p.

**- Madame Phaéton**

Roman 3e mille

Paris, G. Charpentier, 1888, 421 p.

**- Le Journal**

avec une préface de Henri Bouchot.

Paris, 4 rue des Petits Champs, 1890, 57 p. (société artistique du livre illustré "Paris Vivant").

**- Les Marionnettes.**

"Le Petit Bob" (Berceuse n° 138, 1891) - "Le Cri-cri" (Bibliothèque théâtrale)- "La grève des mineurs" (n° 142 - 25, V, 1891) - Lie J. Strauss, Paris. Tous les samedis.

**- Monsieur le Gendarme**

Roman villageois.

Paris, G. Charpentier et E. Fasquelle, 1891, 18 VII, 335 p. Frontisp. (la nouvelle collection).

**- Le Peuple Souverain**

dans la revue socialiste dirigée par Benoît Malon pp. 249-252.

Parislie socialiste, 1892, 768 p. juill - décembre.

**- Le Mauvais Larron**

dans la même revue, même cote to. 21 pp. 561-574 (vision dramatique en un tableau représentée pour la première fois à la Maison du Peuple à Paris (17 mars 1895)

**- Le Drapeau**

et autres extraits de son oeuvre choisis par l'auteur.

Pithivier, A. Nameless, 1899, 19 p. portrait et fac similé. Les classiques primaires (hors d'usage).

**- La Chanson de Jehanne d'Arc**

Paris, E. Fasquelle, 1900, 360 p.

**- Les Roses au Laurier**

Poésies: "Devant les piedestaux", "Dans le rêve", "Pour l'idée"

Paris, E. Fasquelle, 1903, 332 p.

**- Poésies socialistes**

(choix fait par Clovis Hugues)

Paris, A. L. Guyot , 1905, 189 p. (portrait sur couverture)

**- Le Sanglot de Jehanne**

"Du sacre au bûcher".

Ed. 1906, in. 12 XV, 318 p.

Paris, E. Fasquelle, 1906, XV, 318 p.

**- Les Joujoux de Théâtre**

Comédies enfantines.

Paris, C. Delagrave, 1906, 211 p. Fig. (Cendrillon, la Boite à musique, la Maison des dimanches, Tyl l'espiègle).

**- Le Temps des Cerises**

1907 "A la Ville d'Embrun". Illustr. de M. Lecoultrre - 16e mille

Paris, Lie Delagrave, 1948, 232 p. (pas à la B. N., à Bibliothèque Juventa)

**- Poésies Choisies**

Paris, A. Lemerre, 1935, 8 -252 p.

Introduction de A. Zevaes. Préface de Gustave Kahn.

### **III : Autres ouvrages en français**

**- L'Almanach Clovis Hugues**

1902

**- La femme dans son état le plus intéressant.**

1870 cité dans "Encyclopédie socialiste" (Jean Lorris) dans le "Dictionnaire du socialisme".

**- Le sommeil de Dante**

Drame en vers en 5 actes, joué une seule fois.

"Encyclopédie socialiste", "Dictionnaire du socialisme", "La Grande encyclopédie".

#### **- Le neuf thermidor**

Cité dans “Encyclopédie socialiste” et “Dictionnaire du socialisme”. Paru dans les “Oeuvres posthumes” de G. Crémieux.

#### **- Les roses du Laurier**

Paris, 1903

#### **- Sampiero Corso**

Cité de sa main “notes biographiques” Musée Arbaud (archives) et sur son monument à Embrun (8 août 1909)

#### **- Monsieur le bandit**

Un acte en vers joué au théâtre français vers 19?8, cité dans “Anthologie des poètes français” et dans les archives du Musée Arbaud.

#### **- L'Etoile**

Comédie en un acte en vers (“La Grande Encyclopédie”, représentée au Théâtre Indépendant 1888 - Musée Arbaud)

#### **- La Chanson de l'Ecole**

(Embrun) Cité par A. Zevaes comme une œuvre inachevée.

Ces ouvrages ont été signalés par plusieurs biographes comme Charles Verecque, Thieme... et sur son monument à Embrun

### **IV : Oeuvres en italien**

#### **- Francia et Italia**

Ode.

Gênes (30 décembre 1877)

#### **Il violino di Paganini**

Poème.

Gênes (3 février 1878)

### **V : Ouvrages sur Clovis Hugues**

#### **- Poètes et prosateurs**

“Anthologie contemporaine des écrivains français et belges”.

Albert de Nocée, 2e série, vol. 22 n° 10 ,1888, Bruxelles.

Messageries de la Presse, Paris, Librairie universelle, 12 p.

(7 poèmes de Clovis Hugues)

- **Les poètes de la Commune de Paris**

J. Varloot , Paris 1951

- **La Commune de Marseille**

A. Olivesi, 1950, Paris

\*

Tèste integrau

Còpi interdicho

Reserva pèr aquéli qu'an la licènci d'utilisacioun

**C.I.E.L. d'Oc**

***Centre International de l'Écrit en Langue d'Oc***

Sèti soucian:

3, plaço Joffre - 13130 Berro.

Tóuti dre resvra - Tous droits réservés - All right reserved.

© Centre International de l'Écrit en Langue d'Oc - 1996

© Tèste, meso en pajo, fotò e maqueto

realisa pèr Tricò Dupuy

en sa qualita de mèmbre dóu Counsèu d'Amenistracioun  
dóu C.I.E.L. d'Oc